

# زومبي المحروسة

الجزء الأول

تأليف

عمرو الشيمي

## طبعة ٢٠١٩

الشيخي، عمرو

زومبي المحروسة / عمرو الشيخي؛ - ط١- الجيزة: أطلس للنشر والإنتاج  
الإعلامي، ٢٠١٨ .

٢٠٤ ص، ٢٠ سم

تدمك: ٨ ٧٤٥ ٣٩٩ ٩٧٧ ٩٧٨

١- القصص العربية القصيرة

أ- العنوان

# زومبي المحروسة

الجزء الأول

تأليف

عمرو الشيمي



الكتاب : زومبي المحروسة

المؤلف : عمرو الشيمي

الغلاف : عبدالله نصر

الناشر : أطلس للنشر والإنتاج الإعلامي ش.م.م

٢٥ ش وادى النيل - المهندسين - الجيزة

sales@atlasdic.com

[www.atlas-publishing.com](http://www.atlas-publishing.com)

تليفون : ٣٣٠٤٢٤٧١ - ٣٣٠٤٦٥٨٥ - ٣٣٠٢٧٩٦٥

فاكس : ٣٣٠٢٨٣٢٨

\*\*\*\*

٢٠١٨/٢٣٨٥٧  
٩٧٨-٩٧٧-٢٩٩-٧٤٥-٨

عادل المصرى

٢٠١٩  
٩٧٨-٩٧٧-٢٩٩-٧٤٥-٨

نوران المصرى

رقم الإيداع

٢٠١٨/٢٣٨٥٧

الترقيم الدولى

٩٧٨-٩٧٧-٢٩٩-٧٤٥-٨

الطبعة الاولى

طبعة ٢٠١٩



(زومبي المحروسة)  
الجزء الأول





## (تنويه ولا بد منه)

«شعب ابن نكته» ..... ليست كلمات عابرة... أو مثل من الأمثال المتداولة... بل واقع ملموس وحقيقة مؤكدة... يشهد عليها كل من عاشر مصري أو تكلم معه أو اختلط به من قريب أو من بعيد... ولعل تلك الكلمات الثلاث السابق ذكرها ما هي إلا امتداد لما ذكره الشاعر الإغريقي «ثيوقريطس» حين نزل ضيفاً على الإسكندرية في القرن الثالث قبل الميلاد ووصف المصريين قائلاً:

(إنهم شعب ماكر... لاذع القول... روحه مرحة... لكن أحياناً تكلفهم السخرية ثمناً فادحاً)

ولكن!

ما الذي ساق المصريين إلى هذا الفيض السرمدي من النكات... ما الذي دفعهم إلى تبني هذه السخرية الجامحة من الواقع؟ نجد الإجابة شافية فيما اجتمعت عليه أدبيات علم النفس بخصوص الدافع وراء إلقاء النكات إلا وهو «أن تموت من الضحك أفضل من أن تموت من الهم»

فلا شك أن العبث بالصحة النفسية هو أصل كل الشرور... فهو الذي يقود إلى تدهور الصحة العضوية والحياة المهنية

والاجتماعية ويؤثر بالسلب على سلوكيات الفرد وتفاعلاته... بل على حياته بأسرها.

لذا نجد أن طلاقات المصريين وسهامهم الساخرة الموجهة نحو الواقع ما هي إلا إحدى آليات الدفاع النفسي التي يستخدمها الإنسان لا إرادياً كوسيلة للتأقلم مع الواقع المرير أو بالأحرى هي سلاح ردع ضد الوقوع في فخ الإكتئاب السحيق.

ولعل هذا ما أشار إليه الفيلسوف الفرنسي «هنري برجسون» في كتابه الشهير «الضحك» حين قال:

**(الضحك ما هو إلا عقاب للظروف القاسية والأوضاع السيئة حين تتخطى معقول ومنطق المجتمع)**

وكما ورد في تراثنا العربي الثري:

**«شر البليّة ما يضحك»**

ويظهر جلياً أنها ليست البليّة كلها... وإنما أشرها... ولعل هذه شهادة حق وأنصاف في حق المصريين... لاستبيان أن مزاحهم وهزلهم جاء بعد استنزاف كل خيارات المجابهة وكل محاولات التأقلم ووسائل الصبر المتاحة.

من هذا المعترك... قررت أن أسرد بعضاً من تلك الجولات الساخنة بين المصريين والواقع... والتي شهدتها بنفسى وأنا بكامل قواى العقلية... ولم أتكد عناء كبيراً فى تنقيحها وأضافة لمسة جمالية عليها... لأنها ببساطة... تمثل طابع فكاهى تخطى حدود أي فرع من فروع الكوميديا المتعارف عليها حتى وقتنا هذا.

ولكى أتمكن من توثيق كل حكاية وسرد كل موقف بتفاصيله الدقيقة... حرصت كل الحرص على ألا أفقد كلمة أو حركة أو ردة فعل أو حتى غمزة دون أن أدونها... فاضطرت أحياناً إلى الكتابة على أي شيء تصادفه عيني وأجده قابلاً للنقش عليه... ما بين فواتير المحمول وإيصالات الأقساط وأكياس الخضار والفاكهة... حتى ورق المرحاض لم يسلم من سن قلمي.

لذا فدعوتي هنا التي أوجهها إلى القارئ... ما هي إلا دعوة للضحك... من جوف واقع سحيق ممتلئ بالمرارة والمعاناة.





## ( دليل المستخدم )

لكي تستطيع الاستمتاع بأفكار الكاتب (اللي هو أنا) ولكي تتمكن من استيعاب أسلوب المؤلف (اللي هو أنا برده) ... وجدت أنني ملزم بتوضيح بعض الأفكار والإجابة على بعض التساؤلات من أهمها:

### ما هو «الزومبي» ؟

عكفت كثيراً على دراسة ظاهرة «الموتى الأحياء» المعروفين اختصاراً بالزومبي... ولأن خير الكلام ما قلّ ودل... وجدت أن الإجابة الشافية الوافية تتلخص في وصف الزومبي على أنه نوع من البشر يحيا كما لو كان جثة متحركة.. مجرداً من الوعي الذاتي.

### ما هو أصل الزومبي؟

بعد فحص وتمحيص واستقصاء... وجدت أن الأمر بدأ متأسلاً في عقيدة ومذهب ديني يدعى «الزودو»... ظهر بداية في منطقة غرب أفريقيا وأصبح يمارس على نطاق واسع... ومع أواخر القرن التاسع عشر امتد تأثيره ليشمل بقاع عديدة من العالم.

الكلمه نفسها «زومبي» تعنى «إله» في لغة «الكيكونجو» والتي يتحدث بها الناس في جمهورية الكونجو الديمقراطية والمناطق المحيطة.

### **إذا السؤال الوجودى الذي يلوح في الأفق:**

إذا كان مصدر وجود مثل هذه الكائنات ينبع من غرب أفريقيا..... إذا كيف تمكنت مثل تلك اللعنة من بلاد تبعد آلاف الكيلومترات... على سبيل المثال نجد الأدب الأمريكى والفولكلور الأوروبى قد تأثر به كثيراً... في حين لم تتأثر دول إفريقية أكثر تلاحما من الناحية التاريخية وأكثر قرباً من الناحية الجغرافية... وعلى رأسهم بالطبع... المحروسة!!

### **فكانت الإجابة الأكثر عقلانية:**

إن الباب المفتوح هو الباب الوحيد الذي يستحيل فتحه!!

### **يعنى إيه؟**

يعنى... من الآخر...الكائن الوحيد اللى يستحيل أن يتحول إلى زومبي... هو الزومبي نفسه.

### **وبناءً عليه... كان الإستنتاج الأتى:**

أن مصرنا المحروسة والحمد لله... عامرة بهذه الكائنات... بل أنها تمثل إحدى أهم معاقلهم على وجه البسيطة.

## طب ليه مش بنشوفهم ولا نقابلهم؟

لأن لينا قرايب مهمين... فالزومبي اللي عندنا غير أي زومبي...  
يعنى مش هتلاقهم وشهم شاحب وسنانهم حادة ولعابهم ينسال  
من بين ثنايا أفواههم وماشيين في الشارع ببطء بيقلدوا صوت  
الجاموسة العشر... لأ...خالص

الزومبي بتوعنا... زومبي معدلين وراثياً... بحيث يظهروا للعيان  
بنى آدمين زيي وزيك... ولكن ما يصدر منهم من أفعال وسلوك  
وكلمات... هو ما يفضح هويه الزومبي داخلهم.

ونظراً لهذا الاختلاف والتباين في طبيعة زومبي المحروسه عن  
أنواع الزومبي الاخرى المتعارف عليها على مستوى العالم... كان  
لا بد من وضع تصنيف وفق منهجية علمية... فجاء مقتضياً  
على ثلاثة رئيسيات مفصلة على النحو التالي:

### الزومبي الميتافيزيقي:

ده زومبي تخطى الحدود إلى ما وراء الطبيعة... ونزح إلى عالم  
الغيبيات... حيث ينضم إلى قائمة طويلة من الأمور الخارقة  
والأساطير والفانتازيا التي لا دين لها.... حاجة كده من ريحة  
«لورد فولدمورت» و «دارث فيدر» و «سارومان».

## الزومبي الهجين :

باكورة اندماج كائنات غير مصنفة في السلسلة الغذائية مع عناصر غير مدرجة في الجدول الدوري... فكانت الحصيـلة هجين غير متعارف عليه في أي من الأوساط العلمية... ويبقى يا سعده يا هناه اللي يتكعبل في حد منهم... يكفيك أن تعلم أنهم يحتلون المرتبة الأولى عالمياً من حيث وسائل التسلية والترفيه... متخطيين الكاجو واللب السوري والفضائية المصرية.

## زومبي الجيل الرابع :

بخلاف التقويم الميلادي والهجري والقبطي..... وبغض النظر عن الحقبات الزمنية المتفاوتة اللي عدت على أم الدنيا..... أنا قسمت المصريين إلى أربعة أجيال فقط وده من وجهه نظري المتواضعة.... لأنها سهلة ومش مستاهلة.

**الجيل الاول:** بيمثلهم الفراعنة..... ودول مالناش دعوة بيهم.

**الجيل الثاني:** الضيوف.... وده شامل كل الضيوف اللي عدوا علينا... سواء كان ضيف ثقيل أو ضيف مر مرور الكرام... زي الفرس والإغريق والرومان الخ الخ

**الجيل الثالث:** هنا بقى حصل قفزة زمنية هائلة... على أساس إنى اعتبرت أن الجيل الثالث هو جيل العبدلله... مواليد

منتصف السبعينات والثمانينات واللي بمنتهى التواضع بحطهم  
فِي جيل لوحدهم... لما عاصروه من مرحله تشطيطات القرن  
العشرين ومرحلة تسليم القرن الواحد والعشرين على المفتاح.  
وأخيراً الجيل الرابع؛ مواليد كل ما هو بعد الثمانينات.... أبناء  
القرن الواحد والعشرين...الجيل اللي نجح أنه يخلق نوع جديد  
من الزومبي... نوع تخطى كل ما هو مألوف ومعروف لدينا...  
وتجاوز حواجز لم نعلم أنها موجودة بالاساس.

### **يظل السؤال الأخير:**

طب إيه الدليل والبرهان على وجود تلك الكائنات وهذه  
الأصناف وبتلك المميزات المذكورة سلفاً؟؟

### **الإجابة:**

سأقص عليكم من حكاويهم... ونترك الحكم لكم.





# ( ما تيجى يا هندزة )

## الفصيلة: زومبي ميتافيزيقي

حين يقرر الإنسان الطبيعي الذي يحمل الجنسية المصرية أن يستخدم التاكسي الأبيض... يجب أن يكون على يقين أن نسبه تعرضه لمواجهة زومبي تتراوح ما بين ١٠٠٪ إلى ٢٠٠٪... وده حسب إحصائيات مركز الزومبي العالمي.

### وصف للمشهد:

سائق تاكسي في منتصف الثلاثينات على أقل تقدير... له وجه يشبه إلى حد كبير وجه «ميخا» معلم الكاراتيه وصديق اللمبي... مع وجود بعض العلامات على خده الأيمن تتم عن سجل مشرف من المعارك الضارية بالأسلحة البيضاء... بالإضافة إلى أنه كان مربى ضوفر صوبع إيده الخنصر... وبالتالي التزمت التحفظ وانتقاء كل كلمة في الحوار معه الذي دار على النحو التالي:

سائق الحوامة البيضاء: على فين إن شاء الله؟

العبد لله: فندق السلام... من ناحية جسر السويس

سائق الحوامة البيضاء (بعضوية غير مبررة يعطي غيار أول):  
توكلنا على الله

(بمجرد مرور دقائق على انطلاق الحوامة... أحدث الهاتف  
المحمول الخاص به ضجيجاً بتشغيل رائعة (ولاد سليم)  
اللبنانيين... «مفيش صاحب بيتصاحب»... ومن هنا بدأت  
الملحمة)

سائق الحوامة البيضاء (في الموبايل): شوف يا حج... أنا  
قدامي توصيلة دلوقتي لزيون... نصاية بالكثير... أرجع ألقاها  
هي والعيال في البيت... مات الكلام  
العبد لله (في سري): استر يا رب

سائق الحوامة البيضاء (يكمل حديثه في الهاتف بعصبية): يا  
حج أنت مقامك عندي كبير... بس وأيمينات المسلمين... لو رجعت  
وملقتهاش مرزوعة في البيت... لتبقى عركة وتطير فيها رقاب  
العبد لله (في سري): سلم يا رب سلم

سائق الحوامة البيضاء (تزداد حدة الصوت): ماليش فيه...  
حرام مش حرام... أرجع ألقاها في البيت... تيجي مع أخوها...  
مع أبوها... تيجي إنت بنفسك معاها... المهم أرجع ألقاها.

العبد لله (بصوت خافت): صلى على النبي... صلى على النبي  
سائق الحوامة البيضاء (بعد أن استمع لثواني إلى الحج): بص  
يا حج... إلی یلعب مع الديق... يستحمل التعذيب.

العبد لله (في سري): إيه ده؟... حلوة دي تصدق  
(بدأت قياده تتأثر بانفعاله... فبدأت السرعة تزداد  
اضطراباً وبات هناك غرزات بتتاخد ودريقات زجاجية  
مخيفة )

العبد لله: صلى على النبي يا أسطى... خلى بالك بس...  
رجلك تقلت على البنزين  
(يرمقنى بنظرة احتقار... ثم يعاود الحديث)

سائق الحوامة البيضاء: خلاص يا حج... مستي تليفون منك  
(يغلق الهاتف بعنف ويرزعه بين ثنايا الدريكسيون أمام  
واجهة العدادات)

سائق الحوامة البيضاء: معلش يا هندزه... حرك شفايفك  
عشان مش شاييفك  
العبد لله: نعم !!!

سائق الحوامة البيضاء: يعنى عيد الكلام تانى عشان مسمعتكش

العبد لله: لأ مفيش... كنت بقولك بس خد بالك من الطريق

سائق الحوامة البيضاء (بابتسامة سخرية): متخفش يا

هندزه... إنت راكب مع سواق معاه رخصة درجة أولى

العبد لله: ما شاء الله

سائق الحوامة البيضاء: معلش أنا اتعصبت شوية كده... خلاف

كده مع الجماعة

العبد لله: ربنا يصلح الحال

سائق الحوامة البيضاء: اللي كان معايا على التليفون ده يبقى

عمها... وكبير العيلة

العبد لله: خير إن شاء الله

سائق الحوامة البيضاء: لأ... خير إيه... أصل أنا طلقته

الطلقة الثالثة النهاردة الصبح

العبد لله: لا حول ولا قوة الا بالله

سائق الحوامة البيضاء: بس... فعمها عمال يهري معايا في إنه

ما ينفعش نقعد أنا وهيا في بيت واحد... وأنها بقت محرمة

عليًا

العبد لله (وأنا أبتلع اللعاب بصعوبة): هو للأسف... كلامه  
مزبوط

(بنظره ثاقبة أشبه بنظرة عدلى كاسب لشكري سرحان حين  
سأله على حجة البيت في فيلم السفيرة عزيزة)

سائق الحوامة البيضاء: ما أنا عارف يا هندزه... إحنا مش  
ملحدين وولاد كلب يعنى..... عارفين أنه حرام وعزّه جلاله الله  
العبد لله: لا... مش القصد والله... بس هو حكم الدين صريح  
في الجزئية دي

سائق الحوامة البيضاء: والله عارف... وعارف كمان إنه لازم  
«محلل»... عشان أعرف أردھا تانى

العبد لله: بالزبط

سائق الحوامة البيضاء: ما هو الخناقه بقى كلها دلوقتي على  
مين ينفع «محلل»

العبد لله: لا حول ولا قوة إلا بالله.... الموضوع صعب أوى

سائق الحوامة البيضاء: عيلتها كلها ولاد ❖❖❖ ... جايينلى ابن  
خالتها... واد سوابق وشغّال صبي قهوجي... وجايينلى ابن  
عمها... سواق توكتوك...متجوز ومخلف... عالم زباله كلهم

العبد لله: طب إنت مفيش حد عندك إنت من العيلة موثوق فيه ؟

سائق الحوامة البيضاء: وهي دى تفوتنى برده يا هندزه... أنا العيلة عندى أزبل من عندها

العبد لله: لا حول ولا قوه الا بالله

سائق الحوامة البيضاء: بس... الليلة كلها دلوقتى... نجيب مين؟

العبد لله: ربنا يبسرّ الحال ان شاء الله

سائق الحوامة البيضاء: هو الكريم شغال إيه؟

العبد لله: أنا مهندس

سائق الحوامة البيضاء: وعزة جلاله الله أنا قلت كده... أصل الجواب بيبان من عنوانه

العبد لله: الله يخليك

سائق الحوامة البيضاء: طب ورحمة أمى أنا استريحتك يا هندزه

العبد لله: ربنا يعزّك

(اذ فجأه لقيت صوابع يده اليمنى تتحرك من على الفتيس  
وتتجه نحو ركبتى الشمال وتقبض عليها... وينظر إلي وهو  
يمصص شفائفه)

سائق الحوامة البيضاء: طب ما تيجى يا هندزة؟

العبد لله مفزوعاً: أجي فين ولا مؤاخذة؟!!!!!!

سائق الحوامة البيضاء: تخدمني في الحوار ده

العبد لله: حوار إيه؟!!!!!!

سائق الحوامة البيضاء: حوار المحلل ده.... شكك ابن ناس...

وأنا زي ما قولتك استريحتك

العبد لله: صلى على النبي يا عمنا... وحد لله في قلبك كده

سائق الحوامة البيضاء: إنت شكك لسه ما دخلتش دنيا...صح

العبد لله (بجرعه سي فود وغضب عارم): يا عم دخلت ولا ما

دخلتش... مش قصتك

سائق الحوامة البيضاء: والله فرصة نفرح بيك

العبد لله: يا سيدي صلى على النبي.... صلى على النبي

سائق الحوامة البيضاء: والله تبقى عملت فيا جميل... عمري

ما هنسأهولك

العبد لله؛ جميل إيه بس !!... نزلني يا عمنا... بعد إذنك

(ثم تذكرت استغاثة أستاذ «حكم» حين انفرد به عدلي كاسب  
في نفس الفيلم «السفيرة عزيزة»)



بعد ١٨ سنة تعليم... وأكثر من ١٠ سنين بدون زواج... أخرجتها  
هبقى «محلل» لسواق تاكسي يحمل رخصة درجة أولى... يا  
شماتة أبله ظاظا فيا



## ( هزار الألفية الثالثة )

### الفصيلة: زومبي جيل رابع

عصابة من المراهقين.... شملت مجموعة من الفتيان في طور النمو...تحديداً في مرحلة سطوع تلك الخط الحالك الدقيق أعلى الشفة العلوية ممثلاً أحد أطوار نشأه «الشنب»..... يصاحبهم مجموعه فتيات... يرتدون تلك الموضة الملعونة المسماه «Off Shoulder» وكأنه اتفاق مسبق بينهم لتوحيد المقامات... أقصد لتوحيد الأكتاف... التفوا حول منضده تقبع داخل إحدى الكافيهات ذات طابع الهواء الطلق:

أصواتهم كانت مدوية

أفعالهم كانت مخزية

كلماتهم كانت متردية

**المهم برده:**

واضح أن إحدى الفتيات كانت تحاول إستفزاز أخرى وحين زادت حدة التوتر اضطرت أن تصعد من تهديداتها كالآتي:  
الفتاه التي تم استفزازها: والله لو مسكتيش يا «رنا»

هندغ two Gums مع بعض والزقهملك في الCurly  
أنا: أووووووف... Two Gums... وفي الCurly... يا خبر أبيض..  
يا سلام بقى لو كوكتيل «تشيكلس» مستكة مع «ترايدنت» بطعم  
القرفة... يعملوا أحلى ميكس ضد القشرة

أنى أخرى من القطيع تتدخل: فيه إيه ؟..... What's going on

الفتاه التى تم استفزازها؛ عمالة تجرب في الEmoji بتاعه  
«الواتس أب» كلها عندي.. و تبعتهالي

الأنى الاخرى المفوضه بذك الإشتباك: إيه يا رنا .... إيه  
الهازار التقييل ده؟!!

أنا كاظمًا للغيظ: هزار تقييل !!... عشان بتجرب الEmoji على  
«واتس اب» صاحبتهها... ده وإحنا قدكوا كده... كنا بنجرب سن المنشار  
الأركيت على دراعات بعض للتأكد من حدته وكفائته قبل الشروع في  
قص ملصقات ميكى وبطوط من على ألواح الخشب الأبلكاش

(في لحظة موازية كان فتى من الفتيان يمسك أستاذك أصفر مرن  
وينشر الذعر بين القطيع عن طريق لسوعة أيادي الآخرين  
بسرعه ودون سابق انذار...فجاء رد فعل إحدى الفتيات  
عنيًا)

الفتاة المتضررة من اللسوعة بصوت عالي: يوسف !!!)...  
بس بقى... it hurts... بجد..... I am serious.... هقفش عليك  
(بضحكات سخرية استقبل يوسف تعنيف الفتاة ومن ثم  
تجاهل تهديدها... وحول الدفة إلى أحد ذكور القطيع وقام  
بكل قسوة بلسعوته)

أحد ذكور القطيع المتضررين: يابنى بس بقى...إيه هزار  
البوابين ده؟!

أنا: أستك !!!...و بوابين !!!...دونت ميكس أقسم بالله...  
تقريباً العيال دي لو شافت «شومة» ولا «كازلك» ممكن تخش في  
غيبوبة...و احتمال يموتوا إكلينيكيا .

(حين بلغ الأمر ذروته اضطر أحد الجناكيش متطوعاً أن ينتفض  
من مجلسه لإنقاذ الفتيات من آثار الأستك المدمرة...فانقض على  
يوسف بضراوة وأحكم قبضته عليه من الخلف... وظل يضيق  
الخناق على رقبة يوسف لإجباره على ترك الأستك من يده...  
ولكن يوسف ظل متمسكاً بالاستك ومحاولاً لسع يد هذا المعتدى  
الغاشم في مشهد اكشن «سنافر» لا مثيل له...وأخيراً حين بلغت  
الغشومية ذروتها وحين تضاءلت نسبة الدماء المضخوخة إلى مخ  
يوسف... اضطر أخيراً إلى الاستسلام والتفريط في سلاحه وسط  
صيحات فرحة وانتصار من الفتيات)

أنا؛ يا ليت الصبي يعود يوماً.....ده إحنا كنا اللي يقف فينا  
في الفصل عشان يجاوب سؤال بيبقى على يقين أن فيه منصة  
براجل في استقباله لما يجي يقعد.

(اللّه يرحم زمن الهزار المميت.... قصدي الجميل..... زمن  
الرجال)

خلصانة بأستك و Two Gums



# (أ.د. استشاري إطارات/عبده كاوتشات)

## الفصيلة: زومبي هجين

طلعت من عركه مشاوير إنهاء أوراق ومستخلصات وتجديدات واشتراكات (مؤجلة)..... يداعبني حلم الاستلقاء على الفراش والغوص في سبات عميق... و عند وصولي للسيارة... أذ بي أفاجأ بالفردة الشمال الأمامية... «على الارض»..... لحظات صمت وتأمل للعجله.... حاولت جاهداً أن استخدم التركيز والقوة الروحية والعقلية لنفخ العجلة أتوماتيكيا وإصلاح هذا العطل.... ولكن سرعان ما صفعني البرد على الوجه وأيقنت بأنني أسلك أحد مسالك الجنون.... فعملت handshake مع الواقعية.... وقررت أتعامل طبقاً لأليات وأيدلوجيات الواقع المرير.... فطلعت بالعربية وتوجهت لأقرب بنزينة... واللي الحمد لله كانت قريبة جداً... بس المشكلة إنني كنت ماشى تقريباً على سرعة ٢٠ خوفاً من تعرض العجلة المصابة لمضاعفات... المهم وصلت للمتخصص بتاع الكاوتش.... وهناك!!!! حيث تنتهي الأحلام وتموت الآمال وتقع نهاية كل شيء..... وجدت هؤلاء القوم (يأجوج ومأجوج الألس):

إستشاري الإطارات: باشا

العبد لله: السلام عليكم

استشاري الاطارات: وعليكم السلام..

العبد لله: والنبى خد بصّه كده على العجلة دى

(أخذ يرمق العجلة بنظرات ثاقبة تحمل مزيج ما بين برود وكبرياء لمدة دقيقتين)

استشاري الإطارات: تمام..... طب دي عايزة فحص  
العبد لله (باستغراب من الدقائق اللى مرت دون طائل): ماشي....  
دوس يا معلم

(فك العجلة في ثواني معدودة وفضل يفحصها بالعين المجردة  
وفجأة) استشاري الاطارات: مسمار يا باشا

(طبعا لم أخفي أعجابي بقدرته الفائقة على اكتشاف العيب  
دون أي أدوات مساعدة ولكن أعجابي لم يمنعني من السؤال  
برده)

العبد لله: فين ده !!؟

استشاري الإطارات: أهو... شايف راسه

العبد لله: لا حول ولا قوة الا بالله.....طب إيه العمل ؟

استشاري الاطارات: فيه خوابير وفي لحام... و فيه بادج

العبد لله: ايه البادج ده ؟؟

استشاري الإطارات: لحام على البارد... و بادج لزقة

العبد لله: تمام.... طب وده كويس يعني

استشاري الاطارات: باشا... ألمانى... يعنى متانه

العبد لله: على ضمانتك يعنى

استشاري الإطارات (يطرقع راحة يده اليمنى على جانب

قفاه): برقبتي

العبد لله (مبتسمًا): خلاص.... توكل على الله...إديها بادج

إستشاري الإطارات ينظر إلى مساعده: خد يا ض

(تناول الصبي المساعد العجلة وقام بوضعها في ماكينة لفصل

الكاوتش.... وأثناء مراقبة منى لما يدور... حاول الإستشاري

خلق درب من دروب التسلية لقضاء الوقت ظنًا منه أنى اشعر

بالملل...فقام بفتح مسلك دودي... واخذني معاه نحو ثقب

أسود ومنيل بتسين نيلة عليه)

إستشاري الاطارات: مشكلة حوارالمسامير اللي مترمية على الأرض دي

العبد لله: حاجه بشعة أقسم بالله... والله الواحد ما عارف يعمل إيه ؟؟

استشاري الإطارات: ابقى دايمًا شقر على العجل...من وقت للتاني

العبد لله: بحاول والله

استشاري الإطارات: يعنى بعينك كده...لو لاقيتها نايمة..... أوعى تصحيتها..نياهاهاهاه

العبد لله: ايه ده ؟؟؟!! (فيه ايه ؟!!!!)

(ينظر الإستشاري إلى الارض خجلاً بعد أن لاحظ غضب متبادل مني بعد الأثشة الرخيصة دى..... لحظات هدنة وعاد ليضرب من جديد)

استشاري الإطارات: تحب تشرب حاجة يا هندسة لحد ما نخلص

العبد لله (مصطنعاً ابتساماً): تسلّم

إستشاري الاطارات: يا هندسة قول بس...إحنا لسه مطولين حبة حلوين...أمرني... شاي - قهوة - نسكافيه

العبد لله: يا حبيبي تسلم والله

استشاري الاطارات: علياً الحرام شكلك خايف تكون الكبايات مش  
نضيقة.... صح؟

العبد لله: لا والله يا حبيبي أبداً

(مد يده اليمنى المملوطة بالشحم طالبا المصافحة وكرد فعل  
طبيعي قمت مادد إيديه وثقفته منعاً لإحراجه)

استشاري الاطارات: عهد مين ده؟

العبد لله: لا إله الا الله

استشاري الاطارات: إحنا بنغسل الكبايات عندنا ببريل.

العبد لله: يا سيدي والله مصدقك

استشاري الاطارات: طب لو «بريل» مش عاجبك...أنا ممكن  
أغسلهاك بفيروز...نياهاهاها

العبد لله: (شiiiiiiiiiiiiiiiiiiiiيت)

استشاري الاطارات: طب أعملك كاوتشينو

العبد لله: كاوتشينو !!!

استشاري الاطارات: اه.....اللى هو كابتشينو بس بلغتنا إحنا

العبد لله: هههههههه (يا أخى أبو ❖❖❖❖❖ على المسا)

(لحظات من فض الاشتباك...ثم يعاود الكره.....فينادي  
على الصبي المساعد...فلم يسمعه من أول مرة حيث كان يضع  
سماعات في أذنه ويستمع إلى الموبايل أثناء العمل)

إستشاري الاطارات: يا بن ال❖❖❖❖❖...اهو على طول كده.....  
حاشرلي سماعتين في ودانه ولازم أخبطه بحاجه عشان يبصلي  
العبد لله: معلش

إستشاري الاطارات: ويا ريته بيسمع حاجة عدلة.... عارف  
بيسمع مين ؟

العبد لله: مين ؟؟

استشاري الإطارات ضاحكاً برده على نفسه: مازدا الرومي...  
نياهاهاها

العبد لله (في سري وعلى وجهي ابتسامه غضب): ربنا يخذك  
يا بعيد

(لحظات هدنه اخرى لم تتعدى دقائق...ثم يعاود الكره)

استشاري الاطارات: تحب أقولك نكته

العبد لله: قووول (الله يحرقك)

استشاري الاطارات: مرة واحد قهوجى اشترى عريية... قام  
مطلع الكراسي بره... ههههه

العبد لله (محاولاً التظاهر بالسعادة): ههههه (اه يا قديم... يا  
متهالك... يا وغد)

استشاري الاطارات: أقولك واحده كمان ؟

العبد لله: قووول ( إلهي تتسخط شامبنزي)

استشاري الإطارات: مره طمطماية وخيارايه رايعين حفلة...  
وهم معدين الشارع...جت عريية داست على الطمطماية  
هرستها..... سألوا الخيارايه في الحفلة... أُمال صحبتك  
فين... قالتهم مش جايه... اصلها بقت كاتشب

العبد لله (بدون أي ردود فعل): بقولك... أحاسب فين ؟  
عقبال ما يخلص





# «صباحي»... الظاهرة

## الفصيلة: زومبي ميتافيزيقي

بات من المستحيل أن يحظى أي منا بجلسة هادئة - آمنة - مطمئنة - بعيداً عن تناول أسراب الموتى الأحياء... عصابة من الذكور استولوا على منضدة بجانبني. بدا من الوهلة الأولى أنه لقاء أعاده لم الشمل... اللي هو Reunion ولا مؤاخذة... على الأقل للبعض منهم... وبالطبع ميّزهم الصوت الجهور العالي... غير مكثرين بأي كائن حي أو ميّت من حولهم:

زومبي (١): إيه الواد «سعودي» مش جي ولا إيه ؟

زومبي (٢): محصور عند حماته... أنا كلمته... قالي هيشوف سكة كده يخلع منهم ويعدي علينا

زومبي (١): وإنت عامل إيه يا سيد الناس ؟

زومبي (٢): كله بونو

زومبي (١): مبتشوفش الواد صباحي ؟

زومبي (٢): ياعم أهو متلّح... بوزي في بوزه كل خميس



زومبي (٢): واللي قبلها رواية مش عارف اسمها... «مكبس»

أنا (في سري): مكبس!!!... إلهى يا رب تتحشر في «مكبس»  
هيدروليكي بقوة ٣٠ طن... قصدك «ماكث»

زومبي (١): هههههههه... تصدق وحشنى الواد ده... هو شغال  
فين دلوقتى ؟

زومبي (٢): عاطل بعيد عنك

زومبي (١): ايه ده ؟... انا سايبه كان شغال في هنداوى

زومبي (٢): يا عم كل سنة وانت طيب... ده خلع من زمان... أو  
بالأحرى ادولوا صابونة

زومبي (١) ضاحكا: إنت جيت «بالأحرى» دى منين؟!؟

زومبي (٢): مش بقولك طبع علينا... من كتر الروايات اللي  
هراني بيها

زومبي (١): يا نهار ضحك... واللّه الواد ده واحشنى كيك...  
نفسى أشوفه

زومبي (٢): أهو نصاية وهيبيرشت علينا ابقى اشبع منه يا خويا  
زى ما أنت عايز

زومبي (١) والمبسم في فمه: بيعمل إيه دلوقتى غير حوار القرابة

ده

زومبي (٢): بص... هو ماشي دلوقتى بيخبط في الدنيا... من  
ساعة آخر فسخة دي

زومبي (١): ايه ده !!!... هو فسح تانى

زومبي (٢): تانى مين يا عم... قول رابع

زومبي (١): بتتكلم بجد

زومبي (٢) ضاحكا: آه والله... بس آخر واحدة دي كانت مسخرة

زومبي (١) متشوقًا: ايه اللى حصل؟؟!!!!

زومبي (٢): بص... قالي لقاهم داخلين على طمع... ومفيش  
حاجة مالية عينهم

زومبي (١): ازاي؟؟

زومبي (٢): بيقولك كل لما كان يروح يزورهم... كان بيسأل  
خطيبته يجيب إيه معاه... فمرة قالت له هات عليه سابليه من  
«ساليه سكرية»... قامت لقيته جاي وجايلهم عليه بسكوت من  
«بيسكو مصر»... مسكته غسلته بعدها على «الواتس»

زومبي (١) ضاحكًا: يالهوي

زومبي (٢): ومرة ثانية قالت له هات معاك «أساور نوتيللا» مش عارف من فين ورموش الست مش عارف من مين

زومبي (١) ضاحكًا: إيه يا عم العيلة المحرومة دي

زومبي (٢): آه والله... زي ما بقولك كده... تقريباً عندهم السكر ولا إيه ما تعرفش... ده إنت اسمعها منه بقى وهو بيحكها... هتفطس على روحك من الضحك... المهم قامت لقيته داخل عليهم بدسته جاتوه من «مونجيني»... أخذته غسيل ومكوى في التليفون بعد لما رُوِّح

زومبي (١) غارقًا في الضحك: طب وبعدين

زومبي (٢): بس الثالثة ثابتة بقى يا معلم.

زومبي (١): إيه اللي حصل ؟

زومبي (٢): اتعزم عندهم في يوم... قام كالعادة مكلم خطيبته وقالها أجيب إيه... زعقت فيه وقالت له متجيش أي زفت... وفضلت تتخانق معاه... ولما أصر... قالتله هات بيبيسي... ينفع تجيب بيبيسي... مش عايزين حاجة ثانية.



# (الأتوبيس كومبلييه - مع واحد أمبلييه)

## الفصيلة: زومبي جيل رابع

حفنة من الأوغاد..... أقصد الأولاد..... كانوا يجلسون على منضدة بجانبني في أحد الكافيتريات داخل أحد النوادي الرياضية..... كانوا خليطاً يتألف من أربع فتيات وثلاث فتيان... أعمارهم تكاد تمس حاجز المراهقه واتضح فيما بعد أنهم أيضا من أرباب المدارس الأترناشونال..... أصواتهم كانت عالية مما أثار انتباه البعض وأثار غضب آخرون مما كانوا يجلسون في نفس المكان يمنون النفس بالهدوء والسكينة.

المهم !!

قررروا يلعبوا لعبة اسمها: Stop the Bus ... حتى هذه اللحظة مكنش فيه أدنى مشكلة.... المشكلة بدأت بالفعل حين شرعوا في ممارسة اللعبة.... أحدهم أخرج من حقيبته الرياضية كشكول محاضرات سلك ماركة Boo و قام مقطع منه عدد من الأوراق يعادل عدد أفراد الشلة... وبمجرد ما قام بتوزيع أقلام عليهم شرعوا في تسطير الورق بخطوط بدت لي من الوهلة الأولى إنها مألوفة..... بدأ الشك يخالجنني وشعرت إنني أعرف هذه اللعبة!

حتى أيقنت في النهاية بمجرد أن انتهوا من التسطير وبدأوا  
اللعب:

أنهم يلعبوا ولا مؤاخذه «أتوبيس كومبليت» الشهيرة.... تلك  
العبة التي ذاع صيتها في الثمانينات والتسعينات.

واحنا اللي كنا بنلعبها على أساس إنها «أتوبيس كومبلييه»....  
«كومبلييه» كمان مش «كومبليت»!!

مكنتش دي القضية..... القضية كانت تكمن في كينونة اللعب  
نفسه لأنه بالرغم من تشبع مثل هؤلاء بمفردات اللغة الإنجليزية  
إلا أنهم قرروا يلعبوها باللغة العربية وبناء عليه جاءت حلول  
هؤلاء الفتية والفتيات مثيرة... ولسوف أسرد لكم أغرب  
الإجابات وعجائب الكلمات التي جاءت على النحو التالي:

(بدأوا اللعب بحرف النون فكانت إجابة إحدى الفتيات فيما  
يتعلق باسم ولد)

**فتاه ١: نيار**

**شاب ١: انتي بتهزري.... «نيار» إيه ؟**

**فتاه ١: ايوه بجد.....أنا بنت عمتي لسه مخلفة.... و سمّت ابنها  
«نيار»**



أنا (في سري): نجرسكوا !!.... جماد !!!... منه له... منه له...  
طب بالنسبه ل (ناموسية - نفتلين - نجفة) ... موقفهم إيه...  
ولا دول بالنسبالكوا أسامي مدن ومحافظات!!



(أما اسم الأكلة... فلك أن تتخيل الإجابات)

فتاه ١: نستلة

شاب ١: إيه ٩٩

فتاه ١: فيه إيه ١٩... نستلة يا جماعة !!

شاب ٢: هو إيه اللي نستلة... دى اكلة إزاي يعنى

فتاه ١: نستلة دي كلها أكل أصلاً... عندك شوكليت وزبادي

شاب ٢: وانتي يا هانم... اجحفينا

فتاه ٢: أنا... نسكويك

شاب ٢: أنا مش لاعب يا جدعان

شاب ١: اخلصي....مفيش حاجة اسمها كده

فتاه ٢: (بضحكات عالية): ماليش دعوة

شاب ١: ماشي... ماشي

أنا (في سري): نستلة ونسكويك !!...طب واللّه حلو الحوار ده...  
انتوا كده سهلتوا علينا أوى «حرف القاف»... بالذات في الأكلة...  
«قلبظ بجنيه» أو «قنبلة من الكرنك» هو انتوا ياللى تتشكوا في  
قلبكوا مسمعتوش عن حاجة اسمها (نعناع - نيفا - نوجة )



(بعد الانتهاء من روائع حرف النون).... انتقلوا إلى حرف  
(الواو) فكانت الإجابات أكثر تعقيداً.... فكانت أول إجابة لجماد  
يبدأ بحرف الواو هي:

«وايبس» Wipes

**تعليق الاصدقاء:**

شاب ١: «وايبس» إيه !!

فتاه ١: إيه.... «الوايبس» جماد

شاب ٢: بقولك ايه... اسمها مناديل معطرة

فتاه ١: يا سلام.... يعنى إنت بتروح ال «pharmacy» تقوله هات  
مناديل معطرة

أنا (في سري): واللّٰه يا بنتى انا شخصيا بروح ال «pharmacy»  
عشان اجيب حاجه من اتين... يا اما «اسبوسيد» اطفال... يا اما  
«بريزولين نقط للأنف»... لكن جو المناديل المعطره ده... هو باكو  
مناديل من أي إشارة وغطسة في إزازه «لافاندر» وغرق يا معلم



انتقلت الإبداعات بعد ذلك إلى اسم أكلة... فتشرفت بسماع  
كلمة:

وافل = Waffle

تعليق الاصدقاء:

شاب ١ ينظر لها مسبهلاً

فتاه ٢: إيه بقى.... بتبص باستغراب ليه.... ده كمان مش أكلة

شاب ١: يعني ممكن...تمشي

أنا (في سري): وافل !!.... طب ليه...ليه؟! (بصوت أحمد  
حسام ميدو ) ماذا عن (ورق عنب - ويكة - إن شالله «ورك  
فرخة»)....ماذا عنهم...أخبرونى بالله عليكم.....أخبرونى !!



و دى كانت نهايه المبارزة الفكرية واللغوية...حيث استعرض  
كل منهم حصيلة المفردات والكلمات اللى فى جعبته...فهكذا  
أصبحت تلعب الأتوبيس كومبلييه فى زمن الأمبلييه... زمن  
الألفية الثالثة... (كنا رجالاً بل عظماء أقسم بالله)





# (المتزوجون Vs السناجل)

الفصيلة: زومبي هجين

ذهبت مع الوالدة لأحد المراكز الطبية لإجراء بعض الفحوصات وضمن سياق الطور الطبيعي لعملية الكشف تم الحجز ومن ثم انتظار الدور... ولأنى أبغض مشاهد العيادات وانتظار المرضى خارجها ورائحة الديتول ومشاهدة الممرضات تطوف الأرجاء ذهاباً وإياباً... توجهت للخارج قليلاً لاستنشاق الهواء... وجدت شلة من الشباب تتألف من ثلاثة... أعمارهم تقريباً على مشارف العقد الرابع... يرتدون جميعهم ثياب رياضية: شورتات وفانلات كورة تنوعت ما بين (مان يوناييتد وبايرن... والزمالك سبحان الله)... و يبدو أنهم جميعاً تعرضوا لحادث... لأن اثنان منهم كانت تلك اللاصقات الطبية البيضاء تنتشر في أجسادهم ما بين الوجه والمرفق والقدم... حيث تتدلى منها عناقيد القطن المصري طويل التيلة... المهم أنهم كانوا مستظرين باقي أعضاء المنتخب اللى لسه بيلزقوهم جوه... بس من الواضح بردو من نقاشهم أن الإصابات الحمد لله كلها طفيفة... الأهم بقى من كل ده ما دار بينهم من حوار:

**المصاب ١:** هنفضل نخمس في أم السجارة دي كثير.

**المصاب ٢:** يالا يا جدعان صحيح... أنا جتتي رصرصت

**المصاب ٣:** استتوا أكلم الواد "مؤمن"... أنا مش عارف اتأخروا  
ليه؟

**المصاب ١:** تقريبا الواد "ماجد" بيعمل أشعة

**المصاب ٢:** ايه ده بجد.....فيه حاجة ولا إيه ؟

**المصاب ١:** لا عادى يا عم....طلبوا منه يعمل إشاعه... احتياطي  
بس عشان يطمنوا... إن شاء الله مفيش حاجة يعني

**أنا (في سري):** واضح من إصابات أعضاء الفريق الوطني  
ده... أنه حادث سيارة عقب مباراة كرة قدم خماسية

**المصاب ٣:** الواد "مؤمن" مش بيرد عليا

**المصاب ٢:** انتوا اليوم قفل كده خلاص ولا هتعملوا حاجة تانية؟

**المصاب ١:** أنا شايف فرکش كده.... كله يتزحلق على بيته

**المصاب ٣:** فرکش إيه ياض منك له...الكورة دي كانت مجرد  
تسخين للى جاي

أنا (في سري): (بسم الله ما شاء الله....طاقه بقى وشباب  
وكده)

المصاب ١: يا بنى انا راجل متجوز وأعول... انتوا جوز مقاطيع  
وسناجل

المصاب ٢: اتغيرت يا إتش... الجواز بهدلك... فين إتش بتاع  
زمن الفن الجميل... والسهرات الصباحي... حتى مطلع الفجر

المصاب ٣: ده الساعة ثمانية لسه... ده احنا من سنتين تلاته  
كانت "ثمانية" دى لسه بنفكر هنعمل إيه

أنا (في سري): (ابتديت ألمح أطياف شياطين تحلق في الأجواء)

المصاب ١: قديمة يا ض منك له....مش هتعرفوا تسخنوني برده

المصاب ٢ : خلاص يا عم سيبه....هي سنديلا لازم تكون في  
البيت قبل عشرة

المصاب ٣: معاك حق والله....أمان بردو...لحسن الجماعة  
يعملوا معاه الجلاشة

أنا (في سري): (استعيذ يا بنى بالله من الشيطان الرجيم...يمكن  
يتحرقوا)

المصاب ١: ماشى... بكرة نشوفكوا ي ❖❖❖❖ هتعملوا ايه لما تتجوزوا

أنا (يفي سري): (راجل... اثبت على موقفك...عاش)

المصاب ٢: مالکش فيه بقى..... ریح على جنب يا عم السنديريلا...هاه يا حوده هنعمل إيه؟

المصاب ٣: نطلع على "صبحي كابر" ولا "البرنس"؟

المصاب ١: يا جدعان والله الأكل بره ده هيجبكوا الأرض...مفیش أنضف من أكل البيت

أنا (يفي سري): (إنت مثلي الأعلى يا سنديريلا.....قصدي يا اتش)

(المصاب ٣ ينظر له بازدراء)

المصاب ٢ (متجاهلاً): مش فارقة... أنا بس نفسي هفاني على واحد فحفينا من العائلات

المصاب ١: "فحفينا" ايه يابنى... العك ده خطر جداً أقسم بالله

(أصبح الآن ينظر له الاثنان بازدراء)

المصاب ٣ (متجاهلاً أيضاً): خلاص نديها البرنس ونختمها عند العائلات

(يأتى تليفون للمصاب ١... يغير مجريات الأمور)

المصاب ١ ( في التليفون بانفعال): خلاص....اطلبي أي حاجة  
مش فارقة... ماشي... هاتيلي سوبر كرانشي... وفرسكاس  
كبير... لأ مش كومبو.... يا ستي مش عايز بيبيسي أنا

(المصاب ٢ والمصاب ٣... غارقين في كريمة ضحك)

أنا (في سري): ( حين يخذلك الحلفاء)

(المصاب ١ يغلق التليفون وعلى وجهه آثار العار)

المصاب ٣ (بيلئح بالكلام): بس بينى وبينك استقرار بردك  
الجواز

المصاب ٢: آه طبعاً... استقرار... وغداء وعشاء وفطار...  
ومشاهدة أفلام وفشار

أنا (في سري): (بس...هو كده طلع على الstage ومش هينزل)

المصاب ٢: إيه يا سي السيد....الجماعة بيستعوثوك ولا إيه ٤

المصاب ٣: طب يا دوب تلحق... لحسن البامية والفاصوليا  
يبردو.... وإنت عارف بقى مفيش أحلى من أكل البيت.

أنا (في سري): (آه يا حفنة أوغاد...يا خلفه إبليس)

المصاب ١: (مبتسماً بانكسار) ماشي... ماشي... ده ظرف  
استثنائي على فكرة

المصاب ٢: استثنائي !!...."استثنائي" عنده "يوسف" و"جنا"  
دلوقتي

المصاب ٣ (ساخرًا): بقولك إيه....بلاها صبحي... بلاها  
البرنس... إحنا نضرب كوك دور... أهو نكسب فيه ثواب  
ونعدي ناخذ له الأوردر بالمرة بدل ما يدفع ديليفرى  
أنا (في سري): (حد يموت العيال دى....حقنتين هوا هنا... أوام  
وحياة ابوك)

المصاب ١ (حمرة الخجل تزين جبهته): آه يا ولاد ال ❖❖❖❖

المصاب ٢: استقرار..استقرار الصراحة

المصاب ٣: تصدق أنا نفسي اتفتحت على الجواز

أنا (في سري): ( بعد كده لما تقابل العيال دى... تقول أعوذ بالله  
من الخبث والخبائث... كأنك داخل الحمام)

المصاب ١: خلاص يا ❖❖❖❖... يالا أنا دايس معاكوا... بس

نختمها ب PS

المصاب ٢: ايوه بقى

المصاب ٣: عود حميد يا كبير



(و في النهايه انتصر الشر على الخير.... وضحك الجميع...  
بما فيهم العبد لله)





# (إذاعه الفتية الشرعية)

## الفصيلة: زومبي ميتافيزيقي

**المشهد:** سيارة فيرنا متهالكة (عامله يجى مليون ونص كيلو) ...  
عداد الوقود صفر... عداد السرعة صفر.... لا شيء يوحى  
بوجود هذه السيارة في البعد الزمكاني سوى كمية المطبات اللي  
أخذتها على العضلة الخلفية وراسي بتضرب في السقف...  
الوحيدة من نوعها اللي ولا على «سوست» ولا على «كبالن»...  
تقريباً شاسيه العريية عبارة عن لوح خشب أبلكاش يرتكز  
على أزايز بييرة مشبرة... المهم كان يمتطيها سائق ذو أسنان  
شبه متأكلة من رماد السجائر... مع خلفيه راديو شغال على  
إذاعة لم ولن أسعى لمعرفة تردددها ما دمت حياً... كانت تعرض  
برنامج يستضيف شيخ من الأزهر... يتلقى مكالمات هاتفية من  
المواطنين... يستعرض فيها مشاكلهم ويجيب على تساؤلاتهم.

**المتصل الأول:** الو

**المديع:** أيوه يا فندم اتفضل

**المتصل الاول:** ممكن أكلم مولانا

المنذيع: طبعاً... ممكن بس نعرف الأول... حضرتك منين  
واسمك إيه؟

المتصل الأول: اسمي شعبان... من سوهاج

الشيخ: عاشت الأسامي يا شعبان... اتفضل

المتصل الاول: والنبي يا مولانا... أنا متدوز (متجوز) وعندي  
قرطة عيال

الشيخ: ربنا يبارك لك فيهم

المتصل الاول: الله يخليك يا عم الشيخ.....المشكلة دلوجيت  
(دلوقتي)...انى مش مستريح مع الجماعة...و عايز اطلع  
(أطلق)

الشيخ: لا حول ولا قوة الا بالله...أنت عندك كام عيل ؟

المتصل الاول: عندي ستة

الشيخ: لا حول ولا قوة الا بالله...الكبير ولا الكبيرة عنده كام؟

المتصل الاول: عنده يجى سبعة وعشرين سنة

الشيخ: يا راجل يا طيب.....ده عمر بحاله.....جاي دلوقتي  
تكتشف إنك مش مستريح مع الجماعة.....وحدّ الله في قلبك  
وفكر كويس في العيال ومستقبلهم

السواق (بعد القاء مقطوعة موسيقية من المنخار): عنده سته  
وعايز يطلق... ده أنا عندي بت واحده مكملتش سنتين وخايف  
أطلق



المتصل الثاني: ألو !!

المديع: اتفضل يا فندم

المتصل الثاني: كنت عايز أكلم فضيلة الشيخ

المديع: اتفضل...هو معاك

المتصل الثاني: يا شيخ أنا كل شوية أعمل حاجة وأرجع فيها....

مش عارف اثبت على موقف

الشيخ: مش فاهم يا بنى...ممكن توضح أكثر

المتصل الثاني: يعنى كل شوية أكلم بنات وأصحابهم...و بعد كده

أرجع أفكر إنى متجاوز ومخلف

الشيخ: طيب... إنت المشكله عندك في السبب اللي بيردعك كل مرة... واضح أنه مش كافي... ما تفكر ساعتها في ربنا أحسن ما تفكر في موضوع إنك متجاوز ده... غير السبب لعله يسود

السواق ضاحكا: ده إنت راجل حرمجى ابن و❖❖❖... انا مش عارف الشيخ واخده بالهداوة كده إزاي... ده يتسب له الدين على طول

العبد لله: الواحد ما ينفعش يسب الدين... ما بالك بشيخ بقى

السواق: لأ... في المواقف اللي زي دي... يجوز

المتصل الثالث: سلامو عليكموا

المديع: وعليكم السلام... اتفضل... فضيلة الشيخ معاك

المتصل الثالث: ايوة يا عم الشيخ

الشيخ: اتفضل

المتصل الثالث: بقولك ايه يا عم الشيخ... انا دلوقتي عندي

حاجة عايز اعملها وكل الناس بلا استثناء بتقولى لأ.....

فعايز أصلى استخارة عشان أخذ القرار واخلص

الشيخ: الله يفتح عليك... ونعم التفكير

المتصل الثالث: انا بس عايز اسأل... هو مش الاستخاره  
هتخلينى أعمل اللي أنا عايزة ووظظ في رأي الناس  
الشيخ: يا بني الاستخارة لا تغني عن المشورة... هذه نقرة وهذه  
نقرة أخرى  
السواق: عليا النعمة ده شكله بيستخير على شرب بانجو... بس  
خايف يقول



المتصل الأخير (ختامها مسك): السلامو عليكم  
(المذيع بطل يرد على التليفونات... تقريباً جاله جلطة )  
الشيخ مضطراً: وعليكم السلام... اتفضل  
المتصل الأخير: بقولك يا شيخنا  
الشيخ: أيوة... أنا سامعك... اتفضل  
المتصل الاخير: إيه هي الصلاة اللي فيها أربع تشهدات ؟  
الشيخ: ايه !!!

المتصل الاخير: الصلاة يا شيخنا اللي فيها أربع تشهدات !!!  
الشيخ: ده مين اللي قالك كده.

المتصل الاخير: الأمام في خطبة الجمعة...سألنا السؤال ده

الشيخ: لا حول ولا قوة الا بالله

المتصل الاخير: أنا قعدت أدور على النت ومعرفتش ألاقها...  
ربنا يبارك لك والنبى يا شيخنا قولها لي... لحسن الحوار ده  
مطيّر النوم من عيني

الشيخ: هو وعدكوا بإيه للى يجاوب على السؤال... عجل  
وسكوتر وطرييزات بنج وبلياردو

السواق ضاحكا بسخريه: وحياتك شكلوا وعدهم بالجنة

العبد لله (في سري): مش حلوه على فكره

المتصل: لا والله يا شيخ... هو سألنا من باب العلم مش أكثر  
وقالنا ندور عليها

الشيخ: طيب... إرجع إلى أمام المسجد وقوله «أرجوك علمنا  
ما ينفعنا»... بس كده

السواق: أربع تشهدااااات !!!.....دى صلاة إيه دي..... صلاة  
الاستسقا باين؟... ولا الكسوف؟.... تعرفها دى يا هندزه ؟؟

العبد لله: الصلاة على النبي

السواق: الصلاة على النبي ﷺ!!!!!!

العبد لله: آه...بالصلاة على النبي نزلني هنا

السواق: ههههه...إنت قفشت ولا إيه يا هندزه

العبد لله: لا لا.....أحنا وصلنا.....نزلني هنا لو سمحت





# (شلة المغاوير)

## الفصيلة: زومبي جيل رابع

نادرا ما يتعثر الإنسان في رجال... نشق في قدرتهم على التحليل والاستتباط... مغاوير في عقولهم وثقافتهم وعلمهم الغزير... لذلك وجب علينا أن نشارك الجميع مثل تلك اللحظات التي نتعرض فيها لنفحات هؤلاء... لتعم الفائدة والرخاء أرجاء اليابسة.

المكان: إحدى مقاهى الكومباوندات

التوقيت: رمضان ٢٠١٨... ليلة ٢٩ (نحط خطين تحت «٢٩»  
(دى)

الحدث: جروب من الأشاوس جلسوا خلفي عقب انتهاء صلاة القيام مباشرة ودارت بينهم هذه المناظرة الراقية:

مغوار ١: خلصت خلاص يا جدعان.....إيه الدنيا... خطط العيد إيه ؟؟

مغوار ٢: لسه يا عم... أهدي على نفسك... بس والله الواحد رمضان هيوحشه

مغوار ٣: مش أوى الصراحة... أنا حوار السجاير ده كان فشخني

مغوار ٢: بس ونس برده يا معلم... سهر وأمان وصلاة...  
والواحد بيحس إنه بينضف من جوه

مغوار ١: صلاة إيه يا ❖❖❖... إنت صليت كام مرة التراويح  
بذمة أبوك؟

مغوار ٢: بتاع ٤ مرات مثلاً

مغوار ١: يعنى إنت بروح ❖❖❖... عاملنا بوليكة على ٤ مرات

مغوار ٢: ايوة... ليالي القدر كلها

مغوار ٣ (مندهشاً عن سابق جهل): هو ليالي القدر... أربعة؟؟؟؟!

مغوار ٢: ايوة الليالي الفردية كلها بتاعة العشرة

(مغوار ١ يمد يده لمصافحة مغوار ٢)

مغوار ١: طب والعشرة دول... إنت عيل شينكليش

مغوار ٢: ليه ياض... فيه إيه؟؟

مغوار ١: أربعة إزاي يا كابنش؟

مغوار ٢: لأ بقولك ايه... ده أنا قعدت أحسبها بالورقة والقلم

أنا (في سري): ما شاء الله... ورقه وقلم !!... عشان تتطلع عدد

الليالي الفردية في عشر أيام!!

- مغوار ١: يا عم هي كيميا... عد معايا... من غير ورقة وقلم... عندك  
٢١ و ٢٣ و ٢٥ و ٢٧ و ٢٩... خمسسه اهم... جبت أربعة دي منين؟!٩
- مغوار ٢: ٢٥ إيه؟... يابنى ٢٥ مش عدد فردي
- مغوار ١: نعم!!... مش فردي... آمال إيه؟... زوجي
- مغوار ٢: ولا زوجي ولا فردي... ٢٥ ده عدد أولي
- أنا (في سري): ده أكيد كابوس مريب... محتاج حد ينتفلي  
شعراية من الأبط أو الصدر عشان أفوق منه.
- مغوار ٣: إيه «أولى» ده ولا مؤاخذة
- مغوار ٢: الأعداد الأولية ياض
- مغوار ٣ (بعصبية وانفعال): أيوه... فكروني بيها يا جدعان
- مغوار ٢: يابنى الأعداد التي لا تقبل القسمة إلا على نفسها
- مغوار ١: طب ٢٥ بيقبل القسمة على خمسة يا شلحف
- أنا (في سري): الله يفتح عليك يابنى
- مغوار ٢: إيه ده صحيح... تصدق أنت صح
- مغوار ١: أنت قصدك بقى ٢٩... هو ده اللي عدد أولى... ده  
اللي بره الحسبة

أنا (في سري): إلهي أشوفك متشحتف في طرة يا بعيد وأجي  
أزورك بعيش وحلاوة قريب

مغوار ٢: ايوه كده زبطت... بيقى زي ما قولتلك يا ريس... هم  
أربعة بس

مغوار ٣: لأ... ثواني يا جدعان... ٢٩ ده طلع إيه في الآخر؟

مغوار ٣: عدد أولى

مغوار ٣: يعنى مش فردي

مغوار ٢: ولا فردي ولا زوجي

أنا (في سري): هو المسيح الدجال مستكبر علينا ومش عايز  
يجي ليه ؟؟

مغوار ٤: تصدقوا وتؤمنوا بالله... انتوا صدعتوا اللي جابونا

أنا (في سري): ألف حمد وألف شكر... أخيراً عاقل في المجلس

مغوار ٢: بدمتك أنت كنت عارف حوار ٢٥ و ٢٩ ده ؟

مغوار ٤: أبو (٢٥) على (٢٩) على الأعداد الأولية كلها... هيا

ليلة القدر أساساً ليلة ٢٧

مغوار ٢: أنت هتحور أنت كمان... اللي اتقال واللي ثابت

«التمسوها في الليالي الفردية من العشر الآخر»

مغوار ٤: فكك.... هي ليلة ٢٧

مغوار ١: أيوة مين اللي قال ؟

مغوار ٤: أنا الي قلت... الواحد كل رمضان قلبه بيروح ناحية ليلة ٢٧... مات الكلام واتاخذ عزاه... أدركتها بقى ولا ما أدركتهاش يا كوارك منك له ٩٩

مغوار ١: أدركتها يا ريس

مغوار ٤: وأنت يا خروف

مغوار ٢: أدركتها عيب عليك... رحت صليتها حتى مع أبويا وأمى وأختى... بس مش فاكر اسم الجامع

مغوار ١: أنت بقى يا بق... أدركتها

مغوار ٤: لأ... للاسف فوتتها... راحت عليا نومه... أمى كانت عاملة فته بالخل والتوم... فطرنا من هنا... نمت بعدها... صحيت على السحور.

أنا (في سري): إلهي يا رب تتسخط سنجاب

مغوار ٣: أنا بقى أول صلاة تراويح أصليها كانت النهاردة يا جدعان

مغوار ٢: صليت ايه يا حبيب خالتو بالشورت اللي إنت لابسة  
ده !!!

مغوار ٣: ده شرت شرعي يا ❖❖❖

مغوار ١: شرعى مين يا ❖❖❖❖... ده فوق الركبة

(فجأه... قام انتزع مبسم الشيشة من فمه بعنف وقام لافف  
«اللي الطبي» على ذراعاته بحركة دائرية وانتفض من مجلسه  
وانتصب قائماً لإثبات شرعية الشورت)

مغوار ٤: أهو يا ❖❖❖ منك له

ضحك الجميع بمجرد وقوفه... لأن الشورت كان فوق الركب  
ببضع انشات)

مغوار ١: بص على نفسك كده يا ضرير.... بص الشورت واصل  
لفين

يقوم مغوار «٣» بالقاء نظرة على حدود الشورت ليجدها فوق  
الركبة ببضع سنتيمرات... فقام تلقائياً مسقطاً شوية... ثم  
تفقدته مره أخرى فوجده لا زال فوق الركبة... فقام مسقطاً  
شويتين... ثم ثلاث شويات)

مغوار ٤: خلاص يابن ال ❖❖❖❖ رايح فين.... البوكسر بان

إذًا:

الحقائق العلمية المستتبطة من المناظرة الثقافية لشلة المغاوير:

١. الليالي الفردية من العشر الأواخر عددهم أربعة
٢. (٢٩) عدد أولى... مش فردي... ولا زوجي
٣. ليلة القدر ليله ٢٧..... هو قلبه راح كده.... نعمل إيه
٤. يجب تجنب تناول الفتة بالخل والتوم حتى لا تفقد  
فرص التأهل لليلة ٢٧
٥. يجوز اسقاط الشورت بضع انشات في اتجاه الجاذبية  
الأرضية وإظهار البوكسر وذلك لتغطية صابونة الركبة  
لضمان شرعية وقبول الصلاة.





# (العنقاء والحيه الحمقاء)

## الفصيلة: زومبي جيل رابع

شابان في عمر الزهور (زهور الزنبق الأسود بستين نيلة) معهم فتاة في عمر الربيع (الربيع الكاذب) يجلسون في أحد المقاهي... كان الشاب الأول حليق الرأس تماماً (زيرو) مع وجود لحية طويلة بدون شارب... في كوكتيل مجوسي مقزز... اما الشاب الآخر فكان على النقيض تماماً حيث كان يعتلي أسفل منخاره شنب «سليم الانصارى» بينما كان شعر رأسه طويل مما اضطره أن يستعين بعقال ديل حمار أقصد ديل حسان ويحزّمه بتوكه «Pink» أما الفتاة فلا جديد تحت الشمس... الأكتاف عارية والجينز متهتك جزئياً على وشك أن يصبح متهتك كلياً... ولكن ما كان يميّزها هو موضة الحواجب الغريبة المعروفة «بحواجب التتين» والتي لا تأتي منفردة... إذ لا بد من وجود روج أزرق لنحصل في النهاية على هيئة مكتملة من «انثي الفرقلوز»... ولكن أي مما سبق لم يعد ملفتاً للانتباه على قدر السلوك والتصرفات الصادرة من هؤلاء الصبيّة... وإليكم بيان بما حدث:

الشاب المجوسي: هي «ندى» فين ؟

فتاة الدراجون: «ندى» بتصلي

انا (في سري): «ندى» دي اكيد الداعية بتاعه الشلة

ديل الحمار بابتسامه حمقاء؛ وانتي مبتصليش ليه ؟؟

فتاه الدراجون: انا هصليها قضى لما أروح... انتوا بقى صليتوا ؟

ديل الحمار(ينظر إلى صديقه ثم يضحك): أنا مش متوضي

الشاب المجوسي ضاحكاً؛ وأنا لابس شورت.

انا (في سري): وأنا مباحث

فتاة الدراجون ضاحكة: ده انتوا ضايعين.

الشاب المجوسي ساخرًا؛ ماشي يا ست الشيخة.

ديل الحمار بسخرية: كلنا هنصلي لما نروح البيت إن شاء الله

فتاه الدراجون تخاطب ديل الحمار: إيه اللي أنت حاططها في بقك دي

ديل الحمار: دي dental stick

انا (في سري): دينتال إيه يا زلابية!!!... دي خلة ياض... إحنا هنصيع

فتاه الدراجون: وبتفضل تمصص فيها كده

ديل الحمار: اه... دي بقت خلاص جزء من شخصيتي

فتاه الدراجون: طب ما تستعمل سواك أفيد

انا (في سري): الله يفتح عليك يا طاهرة... إنتي فعلاً صاحبة «ندى»  
ديل الحمار: لا السواك مكلبظ كده ومتعرفيش تلعبى بيه...  
لكن الستيك دي في اللذيذ يعنى... أنا ساعات ببلعها عادي  
فتاة الدراجون ضاحكة: بتبلعها... ده إنت ضايح !!

ديل الحمار: بصي دي

(يقوم ديل الحمار بلف الخلة رأسياً بواسطة لسانه وشفته في  
حركة بهلوانية وضيعة... أي تباع ميكروباص يقدر يعملها)  
فتاه الدراجون تتجاهل عرض الأراجوز هذه وتعود لتسأل:  
وانتوا «Friends» من زمان بقى؟

أنا (في سري): ما شاء الله... دي طلعت ما تعرفهمش أساساً؟

الشاب المجوسي: يا بنتى إحنا «Almost» توأم ملتصق

ديل الحمار ساخراً: بس من أبين وأمين مختلفين

فتاه الدراجون: يا سلام!

ديل الحمار: احنا بنشير كل حاجة

فتاه الدراجون: زي إيه يعني

الشاب المجوسي: هات يا بني

(دیل الرحمار يلتقط الخلة من فمه ويخرجها ثم يعطيها للشاب  
المجوسي ليضعها في فمه)

فتاه الدراجون: ايه ده يا مقرفين.... ايه القرف ده !!!؟؟

دیل الرحمار ضاحكا : قرف ايه ... أمال لو تعريف إحنا بنشیر  
إيه تاني هتعملي إيه ؟

(فتاه الدراجون تغوص في ضحكات هستيرية)

أنا (متعجباً من ضحك الفتاة): ايه ده ؟؟.... هو إيه اللي ممكن  
يكونوا بيشيروه أزل من كده

(هنا حزنت كثيراً لنفسي لعدم إدراك هذا الشيء بينما  
أدرسته الفتاة)



ظلت تلك الأسئلة تجول بخاطري طوال رحلة العودة إلى المنزل:

هما ممكن يكونوا بيشيروا إيه أفضع من الخلة؟

هي ندى طولت في الصلاة ليه؟

هي «ندى» اتلمت على الجروب ده إزاي؟



# (يوم من عمري)

## الفصيلة: زومبي هجين

دخلت أحد الستورز التابعة لإحدى شبكات المحمول عشان أحول كاش... وأثناء قيام الموظف المختص بتفقد البطاقة... اكتشفت أن البطاقة منتهية الصلاحية... قلت «حلاوتها في حموتها» ورقعت مشوار للقسم اللي أنا تابع ليه عشان أجددها... فكان ما مكان...يا سعد يا اكرام..... ولا في الاحلام.

### داخل القسم:

تعددت المشاهد وتوعدت أدوار البطولة وسط ضجيج وصراخ وعويل وحشد من الزومبيز والمستنذبن وأشباه البشر..... ليتم تدوين يوم آخر من تلك الأيام القليلة التي نحيها لتسطر ذكرى لا تنسى.

### مشهد (١)

امرأة مصرية متأصلة... من أقاصي الصعيد الجواني تقف أمام دشمة يقبع خلفها موظفة حكومية وزى ما بيقولوا كده كانت «بتخانق دبان وشها» بل كادت تسحقه سحق... :

الموظفة: إيه ده يأمه.....مواليد ٩٩.....إنت عندك ١٨ سنه

الأم الفرعونية: لا.....ده أنا عندي اسم الله عليكى شحوطه

الموظفة: مين اللي كتبك الإستمارة دى ؟

الأم الفرعونية: شحط منهم

الموظفة بمنتهى البرود: طب خليه يصلحهاك....اللي بعده

(تلتقط المرأة الصعيدية الإستمارة بغضب ترتجف له ذكور

السباع ثم تدير ظهرها للدشمة وتتجه نحوي حيث كنت أقف

بجوار البوابة فاجدها تشير بيدها لشاب صعيدي ضخم الجثة

فيه رول إليها مرتعداً)

الصعيدي الجونيور: فيه إيه ؟؟

الأم الفرعونية: إنت كاتبلي إنى لسه مولودة يا بجرة يا بن البجرة

الصعيدي الجونيور: لسه مولودة ازاي يعني...وريني ؟؟

(فجأه يخترق المشهد شيخ ضخم الجثة على وجهه ملامح

غضب عارم)

الصعيدي السنيور: انا مش جوتلك نخلي حد فاهم يملاها يا

بلغة

الصعيدي الجونيور: أنا عاملها صح يا حج

الصعيدي السنيور: هنجيب استمارة تاني ونعاود نملاها يا بن  
الصرمة

الصعيدي الجونيور: طب أنا هتصرف يا حج.....روحوا ارتاحوا  
لحد ما أخلص

(يغادر السنيور مع الأم ليستريحوا حتى يتسنى للجونيور  
تصحيح خطأه فوجدته ينظر الي نظره استغاثه....فبادلته  
بنظره استجابته لتلك الأستغاثة....فسرعان ما وجه لى شهادة  
قيد الميلاد بتاعة الست الوالدة)

الصعيدي الجونيور: معلىش هو التاريخ اللي مكتوب هنا كام ؟

العبد لله: مكتوب ألف تسعمائة تسعة وستون

الصعيدي الجونيور: طيب ومكتوب هنا كام ؟؟

العبد لله: هنا مكتوب بالأرقام ١٩٩٩

الصعيدي الجونيور : طب أصلحها إزاي.....لازم أعمل واحدة  
تانية ؟؟

العبد لله: مش عارف بصراحة.....شوف كده الموظفة أسألها...  
لو ينفذ تصليحها بالقلم... يعنى من تسعة لسته مش هتبان أوى

الصعيدي الجنيور: ماشى... تسلم يا حضرت

مشهد (٢)

امرأة يبدو عليها ملامح رعب تقف أمام نفس الموظفة التي  
سحقت ذباب وجهها والآن تمثّل بجثته

الموظفة: إنتى متجوزة!!؟

المرأه المرتجفة: اه

الموظفة: فين بيانات الزوج...نهار أسود عليا وعلي سنيني  
السودة

(ثم تقذف الإستمارة على سطح الدشمة الرخامي)  
المرأة المرتجفة: معلىش...معلىش

الموظفة : الناس بقت بتسى إنها متجوزة

(يأتى رجل عاقل من خلف المرأه ويسألها)

الرجل الحكيم موجهأ خطابها للموظفة: فيه إيه حضرتك هي  
نسيت إيه؟

الموظفة بعضوية غير مبررة: مراتك نسيت إنها متجوزاك يا  
سيدي

الرجل الحكيم: إهدى بس حضرتك... أنا أبوها

الموظفة بتلقائية وسرعة رد فعل: أبوها !!... أنت صغير أوى  
على أبوها... على العموم ما تزعلش يا سيدي.. بنتك نسيت  
إنها متجوزة

### مشهد (٣)

بلغ الحنق والضيق والسأم ذروته عند تلك الموظفة الحكومية  
فلم تجد شيئاً تفعله للتنفيث سوى دعوة وجهتها للسماء  
متضرعة: اااااااا... ارحمني يا رب

عجوز يقف بجانب بصوت خافت: ربنا يحدك يا شيخة

سيدة أخرى تجلس على مقعد بجانبنا أيضاً بصوت خافت:  
يرحمك إيه !!... الله يسخطك يا بعيدة

العبد لله (في سري): هو كده بالإجماع وبعد إجراء تصويت  
الدعاوي ده... احتمال كبير شوية كده... وهنلاقى ثقب أسود  
اتفتح في السما وسحب الوليّه دي.

### مشهد (٤)

رجل كبير تساقطت أسنانه ولم تصمد سوى الأنياب... يأتي  
بجانبني أثناء فحص أوراقى من قبل موظف محترم... ورغم  
أنه لم يحن دوره إلا أنه بدا أن دوره قد سبق وأن هناك مشكلة

متعلقة باستيفاء بعض البيانات عنه.

(مساعد الموظف المحترم يعطيه ورق الرجل الكبير)

ومتجاهلاً وجودي؛ باشا... شوف كده المشكله دى

الموظف المحترم؛ فين بيانات الزوجة والأبناء يا حج؟

الرجل الكبير؛ مفيش يا بني «زوجة» ولا «أولاد»

الموظف المحترم؛ إنت مش متجوز يا حج !!!

الرجل الكبير؛ لأ... أنا عازب يا بني

الموظف المحترم بابتسامه؛ الله يفتح عليك يا حج

(ثم يوجه الموظف نظراته إلى العبدلله وهو يتابع فحص أوراق

العجوز)

الموظف المحترم؛ أخذنا إيه من الجواز غير المرمطة وقله

القيمة... إنت كده سلطان زمانك

العبدلله (في سري وبابتسامه مصطنعة)؛ اعتقد ده مش الوقت

المناسب للندم

(ثم شرع الموظف المحترم في تفقد باقي البيانات)

الموظف المحترم؛ طيب بص يا حج..... لازم تتختم من

(❖❖❖❖) عشان اكتبها لك موظف بالمعاش

الرجل الكبير: منين يعني ؟

الموظف المحترم: انت شغال فين يا حج ؟

الرجل الكبير: انا مش شغال يا بني

الموظف المحترم: قصدي كنت شغال فين يا حج

الرجل الكبير: مكنتش شغال يا بني

الموظف المحترم: آمال المعاش ده بتاع مين يا حج ؟

الرجل الكبير: ده معاش أبويا

الموظف المحترم: يعني أنت ولا متجوز ولا بتشتغل !.. والله إنت

برنس يا حج



أصبحنا زحيا في زمان... يجسد فيه المرء على عزوبيته -

وحداته - شيخوخته... وبطالته.... لنا الله





# (هو إنترنت كافيه ولا ساير : إنت عايزها إيه ؟)

## الفصيلة: زومبي جيل رابع

نتيجة انقطاع التيار الكهربائي وما ترتب عليه من انقطاع الإنترنت المنزلي... ونتيجة سوء حالة البدائل المتاحة ما بين الاستفزاز المطلق لكيبورد الموبايل وبين بشاعة عمل «Hotspot» من الموبايل والاعتماد عليه... أصبح هناك شبه استحالة لكتابة عريضة خصوصاً وإن كان الهدف هو إرسال بريد إلكتروني مهم.....لذا اضطررت إلى اللجوء إلى أحد كافيئات الإنترنت الشعبية بالمنطقة.

ذهبت إلى أحدهم والذي كنت أتردد عليه أيام الجامعة فوجدت ما يقرب من عشرة أجهزة... سبعة منهم مشغولين... وثلاثة متاحين.

بنغمة حاده وصوت مغوار صرخت «السلام عليكم»... فرد عليا شاب يقبع خلف مكتب حديدي ممثلاً لموظف الإستقبال بالكافيه... وكان شاباً في العشرينات... يزيّن وجهه سكسوكة خليجي واخده وش اكسجين... لتجعل منه نسخه كربونية من ريكو في فيلم «حاحة وتفاحة».

فبادرت بالسؤال :

العبد لله : فيه جهاز فاضي؟

صاحب السايبر (ببرود منقطع النظير) : قد إيه؟

العبد لله : يعنى نص ساعة بالكثير

صاحب السايبر (دون النظر إلي... يشير بيديه) : مكنة خمسة

اللي هناك دي

العبد لله : شكراً

للأسف يبدو أن القرعة لم تكن منصفة أبداً وأوقعتني في أسوأ البقاع... بل بؤرة من بؤر الجحيم..... حيث كانت «مكنة» خمسه يحدها من اليمين مكتب صاحب السايبر والذي يجلس عليه لمراقبه الجميع ولا مانع إطلاقاً من مشاهدة بعض الأفلام الإباحية.... بينما يحدها من اليسار «مكنة اربعه» أو «سته» بحسب ال sequence المكاني... حيث أنه لم يكن هناك أي ترقيم يذكر... فسبحان الذي هداني إلى مكنة خمسة.

المهم أن مكنة «أربعة» أو «سته» كان يجلس عليها تقريباً ال «Co-pilot» أو مساعد صاحب السايبر واللي بتعتبر إحدى أهم مسئولياته هي:

ال «Acting as IT Service Disk» حيث كان ممسكاً بإحدى يديه مجموعة من السديهات وباليد الأخرى شغال تكتكة على الكيبورد بينما كان فمه مشغول بسيجارة أكثر من ثلاث أرباعها «رماد»... كانت إحدى عينيه شبه مغلقة وفيما يبدو أنه كان «على آخره» حيث كان يقوم بتسطيب نسخه ويندووز مضروبة على تلك المكنة.

تجاهلت هذا المشهد الفضائي وشرعت في فتح الميل وفجأه دخل ثلاثة أطفال يبدو أنهم أخوة وكانوا متدرجين في الأطوال والأعمار... فكان أطولهم وأكبرهم لم يتخطى العشر سنوات... بدا وأنه هو المتحدث الرسمي لهذه الأهرامات الثلاثة فبدأ بالكلام موجهاً خطابه لصاحب السايبر الذي كان يتحدث في الموبايل:

**الهرم الكبير: عمو عمو... عندك كابتن «زوبازا» ؟**

**(لا يزال صاحب السايبر يتحدث في الموبايل ويحاول تجاهل الأهرامات الثلاثة)**

**يستمر الزنّ: عمو عمو... فيه كابتن «زوبازا»**

**صاحب السايبر: بس ياض إنت.... أقطم بقى...عايز إيه ؟؟**

**الهرم الكبير: عندك كابتن «زوبازا»....الجزء الخامس**

صاحب السايبر: يلع ❖❖❖ «زوبازا».... اترزعو هنا على المكنه  
دى

(ثم توجه بنظرات ثاقبه إلى مكنة أخرى كان يجلس عليها  
رجل بالغ)

صاحب السايبر: مكنة تسعة... خلاص كده

(لم يمض سوى عشر دقائق.... حتى أتى شاب ممسكاً بسجاره  
(بانجو)..... عينيه مشعشة وتقريباً النيني ساح مع البياض  
وظل صامتاً (١٠) ثواني وأخذ ينظر إلى صاحب السايبر...  
ومن واقع خبرة صاحب السايبر يمثل هذه الكائنات التي تمر  
عليه يومياً... بادره هو بالكلام:

صاحب السايبر: أيوه يا نجم

الشاب البانجو: عندك فيلم «من ضهر راجل»

صاحب السايبر: اه... بس CAM

الشاب البانجو: بونو..... على أنهو مكنة

صاحب السايبر: دقيقة كده

(فاخذ يتفقد الأجهزة ثم وجه نظره صوب أحد الاجهزة  
التي يجلس عليها طفل وكان منفعلاً بشدة مع لعبة كلها ضرب  
وشتيمة ودم بيطرطش في مشهد عدواني مخيف)

صاحب السايبر: إنت يا ض... الربع الساعة خلصت... يالا فزّ  
قوم

الطفل الثائر: يا عم أنا لسه قاعد... أخلص الروند ده طيب  
(طبعاً قصده ال «Round»)

صاحب السايبر: يا ض قوم... هقعك على مكنة تانية

الطفل الثائر: ماشى بس عايز ألعب موطسيكلات (طبعاً قصده  
موتسيكلات)

صاحب السايبر: ماشى.... طب قوم



ثبتي الله وتمكنت من إنجاز المهمة ولكن شيئاً وأحدها ظل  
عالقاً في ذهني

مين كابتن زوبازا ده ؟!.....مبييييييين ؟!؟  
وبعد أن عكفت على البحث والتنقيب تمكنت أخيراً من معرفة أن:

كابتن «زوبازا» ده..... يبقى كابتن «ماجد» ولا مؤاخذه وهو في  
الأصل اسمه «تسوباسا» بالياباني ولكن حرفة المصريين إلى  
«زوبازا»

هنا شعرت بقيمة الشعار الشهير : «أيها اليابانيون... المصريون  
قادمون»



# (الغولوم المعدل وراثياً)

الفصيلة: زومبي ميتافيزيقي

حين كانت ترقد المدمرة زيزي (سيارتنا المصونة) في العناية المركزة... قصدي في التوكيل (لإجراء بعض الإصلاحات)... ونظراً لعدم توافر أوبر وكريم في بعض المناطق دون الأخرى... اضطررت إلى اللجوء إلى الأبرامز البيضاء... أم شريطين سود (التاكسي الأجرة الأسطوري)

أنا عادة بقعد ورا...تجنباً للدخول في أي دردشة أو تفاعل مع الكائن القابع خلف الدريكسيون.....المهم أن الأوسطى - أونكل - سواق المجل كان بيدخن سجارة.....تقريباً والله أعلم كانت ملغمة!!!!

و من هنا كانت نقطة الانطلاق نحو أفاق جديدة ومغامرة من مغامرات الميثولوجيا في أبشع صورها...مع فصيل من بعد آخر.... بعد مقدس غير مرتبط بزمان ولا مكان..... خضنا أنا وهذا الفصيل النادر نقاش فانتازيا... تطرقنا خلاله إلى موضوعات وقضايا شائكة... ما بين علوم وثقافة ودين...فجاء الحوار ثرياً مفعماً بالمعلومات على النحو التالي:

الغولوم المعدل وراثياً: حضرتك السجاير مضايقاك

العبد لله: آه معلش...أصل عندي حساسية منها

الغولوم المعدل وراثياً: من عينيه... أخلص السوجارة دي ومش  
هوّلّع واحدة تانية

العبد لله: (WTF) ماشى... مفيش مشكلة

الغولوم المعدل وراثياً: والله لو الناس كلها ذوق زي حضرتك  
كده... كانت الدنيا بقت أسهل بكثير.

العبد لله: (ميرسى كثير) الله يخليك

الغولوم المعدل وراثياً: والله أنا كان لسه راكب معايا زبون...  
طلع ❖❖❖

العبد لله: ليه بس إيه اللي حصل ؟!

الغولوم المعدل وراثياً: راجل كبير ملتحي.... وشه في نور كده  
وشكله بركة

العبد لله: جميل....إيه اللي حصل ؟

الغولوم المعدل وراثياً: بيني وبينك أنا قلت يا واد ده شكله كده  
يا إما إمام مسجد...يا خادم زاوية... لما أنكشه بكام فتوى كده  
محيرانى

العبد لله (في سري): (إمام مسجد وخادم زاوية... Don't Mix ...  
بس كمل)

الغولوم المعدل وراثيًا: قمت رميت له رمية: بقولك إيه يا شيخ...  
هو إيه حكم الإحتفال بالكريستماس وبابا مويل وحبشتكانات  
رأس السنه دي

العبد لله: («كريستماس» و «بابا مويل»!!!.....الله يحرقك)

الغولوم المعدل وراثيًا: المهم قام مدخني في مواويل وحوارات  
وكلام مكلع كده...مفهمتش منه حاجه... وقام في الأخرقايلي  
«يعنى بدل ما تسهر في مكان كله موبقات وتقعده تستنى عقارب  
الساعة... الأولى اجتهد ليوم الساعة»

العبد لله: جميل

الغولوم المعدل وراثيًا: ولا جميل ولا نيلة يا هندسة... أنا قتلته  
والله يا شيخنا أنا ولا بقعد استنى عقارب الساعة ولا بجتهد  
ليوم الساعة... أنا بنزل من صباحيه ربنا وأرجع على العشا  
مش شايف قدامي... ده أنا حتى عايز أخاوى البت اللي حيلتى  
ومش ملاحق أتلايم على الوليَّة

العبد لله ضاحكًا في سري: (يعني من الآخر: إنت ولا بتلهوا ولا  
بتصنع المجد)

الغولوم المعدل وراثياً؛ يا باشا احنا عايشين فيها ضيوف  
وبنتشعبط في رضا ربنا.... يدوب بنقضى اليوم بيومه

العبد لله؛ ايوه هو قصده اجتهد... يعني اعمل لأخرتك

الغولوم المعدل وراثياً؛ يا باشا الأعمار بيد الله

العبد لله دون الدخول في جدال؛ خلاص...تمام

الغولوم المعدل وراثياً؛ قبله بقى على طول... ركب معايا

مهندس من بتوع الأبراج بتاعة شبكات المحمول

العبد لله في سري؛ (اللهم أمهني القدرة على الصبر «بصوت

الناصر صلاح الدين)

الغولوم المعدل وراثياً؛ قام مرسيني بقى على التيته في حوار

انت اللي كان زي الزفت وكان واقع من كام يوم ده.

العبد لله؛ اه... أنا سمعت إن انت كان بطيء عند الناس... «تي

إى داتا» بالذات

الغولوم المعدل وراثياً؛ «تي اى داتا» مين يا باشا... الموضوع

معدي المحيطات

العبد لله؛ إيه ده... إزاي ؟

الغولوم المعدل وراثياً؛ يقولك فيه كابل عملاق من سنغافورة  
حصلت فيه مشاكل

العبد لله: إزاي ؟

الغولوم المعدل وراثياً؛ قالك سمك القرش كان عمال يعرض  
فيه ولا مؤاخذة

العبد لله ضاحكا: إيه ده فعلاً

الغولوم المعدل وراثياً؛ آه والله... كان فاكره كلب البحر ولا  
مؤاخذة

العبد لله: (و ليه «ولا مؤاخذة»)

الغولوم المعدل وراثياً؛ احنا بس بنحب الهمبكة وبنحب نتفلحس  
كثير... قالك «تى اى داتا»

العبد لله: معلىش أعذرني... الجهل وحش بعيد عنك (يا بن  
الكابل)

الغولوم المعدل وراثياً؛ عارف حضرتك احنا لو كل واحد عاش  
في حاله وبطل فتى وجرى على لقمته بالحلال...هنعيش في  
نعيم

العبد لله: يسلم فومك



لقيته وصلني عند «قسم عين شمس» ويقولى حمدالله على  
السلامة... مع أنى قايله «نادى الشمس»... كنا هنتحيس أنا  
وهو...بس تعاطي مش إتجار... الحمدلله وحسبى الله ونعم  
الوكيل





# (ستيفن ... مات)

## الفصيلة: زومبي جيل رابع

( اتنين في ثانوية عامة... تعقيباً على وفاة هوكينج )

شاب ١: مالك يا صاحبي... لاوي بوزك ليه

شاب ٢: إنت ايه يا بني مش عايش معنا على الكوكب ولا إيه؟

شاب ١: خير... إيه اللي حصل !!؟

شاب ٢: "ستيفن هوكينج" مات !!

العبدلله: (مش عارف هنا حضرنى مشهد "عفركوش" وهو

بيقول "سيدنا سليمان مات")

شاب ١: لا حول ولا قوة الا بالله..... حصل إمتى الكلام ده !!؟

شاب ٢: امبارح ياعم

شاب ١: موته ربنا ولا في حادثة ولا حد فورّه

شاب ٢: لا... موته ربنا

شاب ١: ما دايم إلا وجه الله... بس معلش يا صاحبي... هو مين

"هوبكينز" ده ولا مؤاخذه !!؟

العبدلله (في سري): بس..... ابدينا الملحمة

شاب ٢: "هوكينز" ايه !!!....."هوكينز" يا جاهل....."هوكينز"

شاب ١ : فل .... مين "هوكينز" ده برده؟

شاب ٢: يابني بتاع كتاب "تاريخ مختصر عن الزمن"

شاب ١ : تاريخ ايه يا عينيه ؟!

شاب ٢: "تاريخ مختصر عن الزمن"

شاب ١ : معلش... الدماغ لسه مش ملمسه.... الكتاب بيهرى في

ايه يعنى ؟!

شاب ٢: نشأه الكون

شاب ١ : نعم !!!

شاب ٢: الانفجار الكبير

شاب ١ : ايه !!!

شاب ٢: ميكانيكا الكم

شاب ١: مين !!!

شاب ٢: طب الثقوب السوداء

شاب ١: انا أعرف الرؤوس السودا.... اللي بتظهر على المناخير  
دي وبنفقعها بإيدنا

شاب ٢: مناخير إيه ونفقع إيه... ده إنت اللي فقعتهملي

شاب ١: معلىش يا صاحبي نستحمل بعض... أصل أنا مستشعر  
كده الصراحة من البوليكال اللي معموله دي أن الجنازة حارة  
والميت كلب.

شاب ٢: تصدق وتؤمن بالله إنه مفيش كلب في القاعدة دي  
غيرك... يابنى ده من أعظم علماء القرن العشرين والواحد  
وعشرين كمان

شاب ١ : ايوه... اخترع ايه يعنى.....إيد الهون....مخرطة  
الملوخيه....الكبّة الكهريا.....ايبييه؟

شاب ٢: هو ده تمامك في الاختراعات!

شاب ١: هو مش لازم يا صاحبي يكون في تطبيقات عمليه  
الواحد يستفاد منها

شاب ٢: يابنى ده صاحب نظريات وفيزيائي كبير

شاب ١: فيزيائي!!!!!!.....❖❖.....كل الحدوتة دي على  
فيزيا.... يابن الجزمة ده إنت جايب فيها ملحق... ١٩ من  
خمسين يا ❖❖❖❖



(يخيّم الصمت على الأرجاء لبرهة..... يعقبه صوت صرصور  
الحقل حيث تزداد حدته تدريجيًا كما لو كان يسب ويشتم  
باللغة الصرورية... هنا أيقنت أنني في حرم واحدة من  
أعظم قصف الجبهات التي تشهده البلاد منذ قرون عديدة)



# (نفخه في الشوكمان)

الفصيلة: زومبي هجين

أثناء إحدى مغامراتي العجيبة مع التاكسي الأبيض... وقفنا في إشاره... فلفت انتباهنا سيارة «كيا سيراتو» على يسارنا واخده خبطة من الجنب تشفي السقيم فكانت تلك هي مدخلنا إلى حديث مشوّق:

سائق الدابة: لا حول ولا قوة بالله

العبد لله: خبطة جامدة اوي

سائق الدابة: ولا جامدة ولا حاجة..... هي العربيات دي كده...  
صاجها فلين

العبد لله: ههههه... اه فعلاً... الجديد كله كده

سائق الدابة: بص يا هندسة... العربية يعنى شاسيه وموتور...  
غير كده رتش

العبد لله: دي حقيقة

سائق الدابة: ركبت ال١٣٢... ولا ال١٢٤... ولا ال٥٠٤ الوحش

العبد لله: اه والله... زمن الفن الجميل

سائق الدابة: انا هقول لحضرتك على حاجة.... يمين أتحاسب  
عليه يوم الدين

العبد لله: مصدقك يا حبيبي... من غيرما تحلف

سائق الدابة: انا مره كنت في شق التعبان..... أقسم بالله  
لقيت بيجو سبعة راكب شايلة على التقفيصة بتاعتها من فوق  
صخرة... توزن لها يجى اتنين تلاتة طن

العبد لله: (صباح النخع) نهاار أبيض... معقول !!!

سائق الدابة: أقسم بالله

العبد لله: وحش بصراحة البيجو دى (اللهم ألهمنا الصبر  
والسلوان)

سائق الدابة: حضرتك برده ابن امبارح..... أنا عندى ٥١ سنة

العبد لله: ربنا يديك الصحة (بس أنا مش ابن امبارح... مش  
أوى كده)

سائق الدابة: الله يكرم أصلك

العبد لله: حبيبي

سائق الدابة: أنا في أواخر التمانينات... في يوم كده كنت واقف مع واحد صاحبي عند كشك بنجيب سجائر.... قوم ايه.... الملحك عربية رمسيس مركونة تحت الكوبري.... طبعاً ما توعاش إنت على رمسيس

العبد لله: لأ الصراحة موعاش عليها.... بس عارفها

سائق الدابة: مش بقول لحضرتك... ابن امبارح

العبد لله: (ما خلصنا بقى.... Say it one more time بصوت «هانكوك»)

سائق الدابة: المهم حضرتك العربية كانت معدومة العافية.... الأربع فرد على الأرض..... مردومة زبالة ولا مؤاخذه جواها وبراهها... تحت الشاسيه وعلى الكبوت.... من الآخر طرانش.... المهم قمت سائل صاحب الكشك:

العربيه دي تخصك... قالى لأ.... بس صاحبها معرفة.... عايز حاجة؟

قولتله متعرفش يخلصها على كام ؟

قام ضاحك... و قالى دى خرده هتعمل بيها ايه ؟

قولتله مالکش فيه..... وصلني بيه

العبد لله: يا نهار أبيض !!! (كامل كامل..... لا راد لقضاء الله)

سائق الدابة: قام باعت عيل صغير مرسال لصاحب العربية....  
طلع ساكن قريب...مفيش عشر دقائق ولقيت شابين جاين  
علينا وشكلهم أخوات.....ممشتش غير وأنا مخلصها معاهم  
العبد لله: يا نهار أبيض..... طب فحصت العربية بقى على  
كده

سائق الدابة بتعجب استنكارى: فحصتها !!!..... حضرتك عايز  
أقولك اننا فتحنا نعاين الموتور..... لقينا قطة وعيالها جوه

العبد لله: ههههههههه.... يا نهار ابيض

سائق الدابة: قعدنا نضحك كلنا..... لأ وشوف اللي جايه دى  
بقى

العبد لله: هههههههه... إيه اللي حصل

سائق الدابة: أخذت العربية.... بالقطة..... بعيالها

العبد لله: ههههه.... ده كده أنت اشترت عربية.... وأسرة  
تعولها كمان

سائق الدابة: هههه....زي العسل والله يا هندسة

**العبد لله:** (إنت كداب على فكرة...مش حلوة وأنا معترف)

**سائق الدابة:** المهم أخذتلك العربية زى ما شفت كده....  
خردة....لونها رايح من تكحيته العفرة والركنة... قمت اول  
حاجة عملتها.... أخذتها عند واد بوهيجي سيارات معرفة....  
واد ايديه أخطبوط

**العبد لله:** يااه...ده أكيد كانت عايزة شغل جامد

**سائق الدابة:** شغل جامد !!!.... حضرتك الأيام دى مكنش في  
أفران زى اليومين دول.... الواد قعد على العربيه ٣ ايام بليااليهم  
مطبق...مدقش فيها زاد ولا زواد

**العبد لله:** ( زاد وزواد !!!.... إنت متأكد إنك ٥١ مش ٨٦ )

**سائق الدابة:** العربية طلعت من تحت إيده فبريكة..... قمت  
مزيط لها ٤ فرد وشديتها شدة محترمة

**العبد لله:** ما شاء الله

**سائق الدابة:** خد اللي جايه بقى

**العبد لله:** إيه اللي حصل؟ (انا مستمتع جداً... جداً.... منه  
له....منه له)

سائق الدابة؛ كنت في يوم في البنك بقضي مصلحة..... لمح  
العربية رجل كباره كده كان معاه خنزيره بسواق...قالي تبيع  
عربيتك دي.....قولتله دي عزيزه عليا...ممشيش غير والعربية  
معاه.... خلصتها على ضعف تمنها اللي اشتريتها بيه

العبد لله: يا سبحان الله.... انت اجتهدت وربنا جزاك خير

سائق الدابة؛ هي أرزاق..... ويرزقكم من حيث لا تعرفون

العبد لله: (تعرفون !!!!!!.... إلهي يا رب تتحرق في عربية رمسيس  
أبوابها مصنكرة داخل فرن بوهية)



# (Bad Mom بالعربي)

## الفصيلة: زومبي ميتافيزيقي

اصطدمت بكائنات مصنفة في الجدول الدوري الحديث على أنهم عناصر «لافلزية مشعة غير مستقرة»... واللي ما يعرفش يعني إيه كائنات لافلزية - مشعة - غير مستقرة... فدي عناصر الإلكترونيات فيها بتلف حولين نفسها... والنواه بتترقص مع نفسها... ومحدث عارف الذرة بتاعتها بيحصل فيها إيه بينها وبين نفسها.... المهم أنه دار بينهم حوار شيق حول تربية الأطفال وبعض المواضيع الأخرى - التافهة - الساذجة - اللي هحاول إنني أتجاهلها وأسلط الضوء فقط على موضوع تربية الأطفال:

**لافلزية ١:** «مرمر» حبيبتي عاملة إيه ؟

**لافلزية ٢:** زئرده....مطلعة عيني

**لافلزية ١:** وحشاني أوى

**لافلزية ٢:** إنتي «بجاد» أخباره آيه ؟

**لافلزية ١:** أهو كويس.....سيبته عند ماما النهاردة....إنتي

«مرام» سيبتيها فين ؟

لافلزية ٢: مع «أحمد» عند طنط

أنا (في سري): تمام... واضح أنهم سربوا البوبي والقطعة اللي عندهم

لافلزية ٢: «بجاد» عامل إيه في ال«School» ؟

لافلزية ١: So far so good

لافلزية ٢: فكريني... هو في مدرسة إيه ؟

لافلزية ١: (بلا بلا بلا)

أنا (في سري): ده اسم مدرسة ولا «مضاد لارتجاع المريء» !!!

لافلزية ٢: كويسة ؟؟

لافلزية ١: بصى هو الإنترنتناشونال كله فيه عيب خطير...الولاد بيبصوا لبعض أوى

لافلزية ٢: you mean just staring or you mean jealousy

لافلزية ١: I mean Jealousy ...No

أنا (في سري): (Staring)!!!... ما شاء الله... العيال هتبرق لبعض في المدرسة... ده إيه الIQ اللي معدي مستوى ذكاء «الكانجرو» ده)

لافلزية ٢: بس "I think" ده طبيعي

لافلزية ١: طبيعي بس ل limit معين

(لافلزية (١) ترتشف بواسطة الشاليمو بعض قطرات  
من ال « Juice » اللي قدامها ثم تعاود الحديث)

لافلزية ١: يعنى «بجاد» جالي من كام يوم...لقيته بيقولى مامى  
أنا عايز كروكس Star War...زى بتاع «سهيل» صاحبي

أنا (في سري): («بجاد» و «سهيل» !!!.... والله يا فرحة أشراف  
قريش بينا)

لافلزية ١: راح باباه نزل دور له عليه وجابهوله معرفش ب ٩٠٠  
جنيه تقريباً

أنا (في سري): ٩٠٠ لحلوح... ده أنا كل اللي لابسة... بالجزمة  
بالشراب بالغيار التحتاني ميكلمش ٦٠٠ جنيه

لافلزية ١: تخيلي يجرى تاني يوم بعد ما جابهوله يقولنا إيه ؟

أنا (في سري): أكيد بابي غلط وجابلو بتاع start trek مش star war

لافلزية ٢: إيه ؟

لافلزية ١: قالنا عايز شراب اديداس عليه زى سهيل

أنا (في سري): «سهيل» ده هيدمر الأسرة السعيدة دي.

لافلزية ٢: طب وعملتوا إيه ٩٩

لافلزية ١: قلناله لأ طبعاً.... مش كل حاجة تطلبها هنجيبها

لافلزية ٢: برافو عليكى

لافلزية ١: بس للأسف قعد يزن ويعيط

لافلزية ٢: لأ...كده لازم «Punishment»

أنا (في سري): أنا شايف كده برده يا حجة... التعذيب كويس

برده في الحالات اللي زي دي... ربنا بيارك لك في «مرمر»

لافلزية ١: حصل... بس أنا وباباه متعاهدين إننا عمرنا ما

هنمد إيدينا عليه ولا نزعق له

لافلزية ٢: خلاص مش لازم...ممكن Isolation

العبدلله: (ايه ده ٩٩)

لافلزية ١: بصى... هو أنا عرفت من دكتورة قريبتنا كده

أن موضوع ال «Naughty Corner» ده فيه مشاكل وبيأثر على

شخصية الطفل

لافلزية ٢: إزاي ٩





# (الرجال من المريح والنساء من الزهرة وهذا السائق من زحل)

الفصيلة: زومبي هجين

للإختصار... ربنا رزقني بسواق تاكسي... اضطرتنا الظروف  
إلى إشعال فتيل نقاش له علاقة بالخطوبة والجواز فكان هذا  
المختزل المفيد:

الكائن الزحلي: بص يا هندسة... حوار الجواز ده في كلمة  
واحدة... «مسئولية»

بس خلاص... مسئولية بيثيلها اتنين... راجل وست... خمسين  
في المية وخمسين في المية

العبد لله: واللّه كلام زي الفل

الكائن الزحلي: واللي فيهم مش هيقدر يشيل الخمسين  
بتوعه....هيوقع التانى معاه

العبد لله: اللّهُ يفتح عليك

الكائن الزحلي: آه واللّهُ... زى ما بقولك كده... محدش يستنى  
من التاني إنه يشيل ال ٥٠ بتوعه ويشيل منهم كمان ١٠ ولا ٢٠

زياده من بتوع التانى....مش هيقدر...ولو قدر فترة... مش  
هيقدر يستمر... هيقع... هيقع... عاجلاً أم آجلاً

**العبد لله:** عداك العيب

**الكائن الزحلي:** الراجل ليه الخمسين بتوعه حماية وأمان  
وإنفاق...و الست الخمسين بتوعها تصون عرضه وتربي عياله  
وتحفظ بيته

**العبد لله:** مفيش كلام يتقال بعد الكلام ده

**الكائن الزحلي:** اللي هيعمل فيها بقى «جون سينا» ويشيل هو  
الليلة كلها...لا مؤاخذه هيتسفلت

**العبد لله:** تمام (جون سينا !!!..... يعني هو ده البوب بتاعك)

**الكائن الزحلي:** المثل بيقولك اللي يربط في رقبتة حبل...هيالقي  
ألف من يسحبه

**العبد لله:** قاسية... بس حلوة منك

**الكائن الزحلي:** أنا لسه مطلق من يومين

**العبد لله:** لا حول ولا قوه بالله (أقسم بالله كنت متوقع القلبة  
دى...عيب ده أنا قديم)

الكائن الزحلي: كنت شايل أنا ٨٠ والطرف الثاني شايل ٢٠....  
قامت المركب مالت وفضلنا على وضعنا ٣ سنين لحد ما في  
الآخر غرقت

العبد لله: لا حول ولا قوة إلا بالله

الكائن الزحلي: هي أرزاق يا هندسه..... الجوازات أرزاق أصلي  
العبد لله: دى حقيقه

الكائن الزحلي: يعني أنا واحد صاحبي متجوز (٣).....وال (٣)  
على ذمته

العبد لله: ايه ده !!.....معقول

الكائن الزحلي: آه... الواد ده برنس في نفسه أوى

العبد لله: صعب أوى الكلام ده

الكائن الزحلي: يا باشا ولا صعب ولا حاجة... احنا سألناه وهو  
قالنا على الزتونة

العبد لله: إيه بقى ؟

الكائن الزحلي: قالك التلاتة مقسمهم كالتالي: «أم العيال» ودى  
بتاعة البيت والأسرة وأحلام الأستقرار الوردية.... «التانية»  
بقى بتاعه الدلع والخروجات والشهيسة

(صمت لمدة نص دقيقة... لإضافه مزيد من التشويق والأثارة)

الكائن الزحلي: ما سألتنيش يعني الثالثة مين !!

العبد لله: ( يقطعنى يا خويا والله ما أخذت بالي) أه صحيح  
والثالثة ؟؟

الكائن الزحلي: قالك الثالثة دي بقى رمانه الميزان....اللي  
بتزبط الأولى والثانية

العبد لله: مش فاهم

الكائن الزحلي: النسوان تموت من الغيرة.... وهي الثالثة دي  
اللي زبطاله الأولى والثانية

العبد لله: ايه ده !!!...هم التلاتة عارفين أنه متجوز على كل  
واحد فيههم

الكائن الزحلي: أيوة يا هندسة... أمال أنا بهاتي في إيه من  
الصبح

العبد لله: يا نهار أبيض... ده جبار... والثلاثة راضيين

الكائن الزحلي: أيوه يا هندسة.... مش بقولك... الواد فرعون...  
فرعون على حق

العبد لله: طب ممشى الدنيا إزاي وعرفناها... إنما اتجوزهم  
التلاتة إزاي على بعض

الكائن الزحلي: لا.... اتجوزهم إزاي بقى... ده حوار تاني خالص

العبد لله: ايه بقى ؟ (كلي آذان مصغية - صاغية - متصغية)

الكائن الزحلي: الواد ده شغال على حوارات خرز المحبة والخواتم  
السليمانية والأعمال الروحانية والأبراج

العبد لله: ههههههه

الكائن الزحلي: بتضحك على إيه يا هندسه.... إنت فاكر  
الكلام ده هفلطة ولا إيه

العبد لله: نعم !! (الله يحرقك إنت وفرعون صاحبك في يوم  
واحد يا بعيد)

الكائن الزحلي: يا هندسة ده علم... بيدرس

العبد لله: (تصدق وتؤمن بالله أنا هعملك واحدة «Attitude Adjustment»  
بتاعه جون سينا وأقربها بحركة الاضضاع الأشهر «STF»)





# (أربع بنات وزابط «أداء»)

## الفصيلة: زومبي جيل رابع

وأنا مرتحل إلى البيت عقب عشر ساعات متواصلة من العمل الشاق... تشاء الأقدار أن يصادف هذا اليوم احتفالية الكريسماس.

وأنا في طريقي إلى الجراج وأثناء مروري من خلال أحد المولات بحكم مكان عملي تعرقلت بشاب في «السبعشترات» يرتدي شورت (في عز الجليد) على فانلة سبعاية ومن فوقه سويتير مع وجود سبحة تتدلى من رقبته وتنتهي بمفتاح النيل في كوكتيل غريب الأطوار تقشعر له الأبدان وتشعر معه برغبة شديدة في القيء والإسهال... كما أنه كان ملتجئاً تلك اللحية الشمطاء التي تذكرني بأخبار «بنو قينقاع» في فيلم الشيماء.

كان يقف مع الشاب ثلاث فتيات في «الستشترات» يرتدون جميعاً جينزات ممزقة ومهتكة..... تقريباً نفس اللون ولكن مع اختلاف أماكن انتشار الثقوب حيث تنوعت ما بين الركبة والفخاد!!

نتجاهل كل ما سبق لانه بات مشهد مألوف خصوصا للنوع  
الحلوف اللي زيننا....

الواقعة حصلت فعليا حين فوجئت بفتاة في «الخمستشرات»  
تركض مسرعة من الجبهة اليمنى (بدون كره) ولا تكثرث  
بوجود شيء مادي يشغل حيز كبير من الفراغ (اللي هو أنا)  
يعترض طريقها..... اللذيذ في الموضوع أنها بمنتهى المرونة  
قامت بمراوغة زئبقية لتتجنب الإصطدام بي... وبمهارة  
المدافعين المخضرمين... أتمسرت في مكاني إخراجاً وحتى لا  
يحتسب ركله جزاء.

الحمد لله وصلت الفتاة للمرمى اللي هو الشاب الملتحي  
والثلاث فتيات..... ثم فجأه صرخت فرحاً وطرباً : رووو.....  
!!Miss You so much

وربتت على صدره بقبضه يدها برقة الفتيات الكيوت....  
فاندفع خطوة للخلف (واضح أن أيديها ثقيلة أو هو اللي شاب  
( ❖❖❖❖ )

**برده مش مهم !!**

أنا أول شيء طرأ على ذهني هو "روو" دي أكيد اسم دلع....  
بس يا ترى دلع إيه.... الشهاده لله أنا أول حاجة جت في دماغي

اسمين..... يا "ريهام" يا "رودينا"...مش عارف ليه.... مع إنها  
أسماء بنات... بس تتماشى مع هيئة الشاب الخنفس ده.....  
وبتفكير ملائكي موازي وحسن ظن بالزومبييييز: قلت أكيد الواد  
الوحيد على أربع بنات.... وكان متغربّ بقاله كثير... والنهاردة  
رجع من السفر فاستقبله اخواته البنات الثلاثة في المطار  
وجابوه على هنا عشان يشوف أخته الصغيره... آخر العنقود  
بقى وأكثر واحدة مفتقدة أخوها الكبير (السند والضهر)...  
ولعل هذا يفسر حماسها الزائد ومراوغاتها البركوتية لملاقاة  
أخيها بعد طول غياب!!

ولكن حدث ما كنت اخشاه:

إذ أخرج الشاب من جيب السويتير دميّه على شكل "بابا نويل"  
وأعطاهما للفتاة فأخذته بشغف وسعادة غامرة قائلة: بتهزر....  
ده awesome آخر حاجة يا "رفيق"... بجد حلو أوى!

رفيق رداً عليها: أنا جبت لأخواتى وقلت أجيبلكوا إنتوا كمان!!

**منذ تلك اللحظة:**

أنا مش هنكر أن فيه حاجة جواية اتكسرت..... وشعرت بوخذه  
خفيفة في القلب

مش عشان اسم الولد طلع «رفيق» اللي هو لا يصلح سوى اسم  
مدرس أول لغة عربية بمدرسة تجريبية!!!.....خالص والله  
ولا حتى عشان مطلعوش أخوات ومفيش أي صلة صلة رحم  
تربطهم!!!!!!

إنما تأثري كان مصدره تلك العاطفة التي جعلت مثل ذلك الشاب  
لا يتناسى هؤلاء «الشيكس» من الهدايا والعطايا.... واعتبرهم  
جزء من عائلته... من منطلق «عائلة كبيرة تساوي حياة أفضل»



**الاجمل بقى:** ان فيه اتنين من بتوع أمن المول سمعتهم بيقلوا:  
تلاقى «بابا نويل» ده معمول حلاوة... شايف يا فقري يا بن  
ال ❖❖❖❖ الهدايا... مش إحنا يوم مولد النبي.... محدش  
صبّح علينا حتى بقرص مشبك.



# (الرهانات المعدلة وراثيًا)

## الفصيلة: زومبي جيل رابع

### حدث في ستور فودافون:

الستور كان زحمة ومع ذلك الواحد أصر إنه يخلص ويدفع الفاتورة عملاً بمبدأ «لا تؤجل عمل اليوم إلى الغد»... بس يا ريتي كنت أجلته للغد... المهم شاءت الأقدار أن أنا أطبق المبدأ ده في اللحظة دي بالذات دونا عن سنين العمر اللي ضاعت... عشان استمتع باحلى ديالوج بين ولد و بنت.... مثلوا كل ما هو ❖❖❖❖.... خلينا نشوف:

توصيف بس كده على الطائر للشاب والفتاة: الشاب مفتول العضلات يرتدي سويت شيرت بادي علي شورت (مشجر)... واضح إنه لسه خارج من الجيم وملحقش يغير... وواضح كمان إنه النهاردة كان بنش ودراعات... لأنهم كانوا متورمين بزيادة... أما الفتاة فكانت ترتدي ذاك الجينز المهتك الملعون بعدد لعنات القبور اللي اتفتحت من أيام «أدم» لحد دلوقتي (بصوت يوسف بك وهبي) أما عن الديالوج... فكان كوميديا سوداء ومنيلة بستين نيلة على النحو التالي:

توتو عضلات: مش هتقولي المفاجأة اللي عاملها «سو»

الآنسة أشكيناز: يا بني بطل زنّ بقى

توتو عضلات: يالا بقى بجد

الآنسة أشكيناز: مش قايلة.... الفلانتاين قرب خلاص... Wait for it

توتو عضلات: عايز أعرف والله

الآنسة اشكيناز: أقطم بقى... For God's Sake

توتو عضلات: والله ما هقول لحد إني عرفت

الآنسة اشكيناز: Stop it... والله هلطشك بالألم

أنا (في سري): نهاااار أسود... قولي على نفسك يا رحمن يا  
رحيم... ده لو هوّشك بس هيغمى عليكى... ده الباى بتاعه قد  
راسك

توتو عضلات: أهون عليكى... تلطشيني

أنا (في سري): WTF

الآنسة أشكيناز: والله على خلقتك وسط الناس

أنا (في سري): لأ كده خلاص... تقدر تتحرك يا ليثي

توتو عضلات: ألتشيني... بس قوليلي بعدها

أنا (في سري): (WTF تانى مره )

الآنسة أشكيناز: أنا فعلاً Can't Imagine ... هو أنا لو قلتك  
هتبقى فين ال Surprise في كده... إيه الخرى ده !!  
أنا (في سري): خري !!!.....خرى علي دماغك يا شيخة انتي و  
«توتو» و «سو» في يوم واحد  
توتو عضلات: طب تعالي نلعبها Guess Up ... هقول أنا حاجة  
لو غلط أبقى Spit مرة واحدة  
أنا (في سري): «Spit» !!... والله أنا لولا إني صايم وريقى  
ناشف... كنت لعبت معاكو  
الآنسة أشكيناز: لا والله... طب ولو صح  
توتو عضلات: لو صح بقى... «Just shake your Head»  
أنا (في سري): طب الحمد لله إنها «Shake your head» مش  
«Shake» حاجة تانية... احنا برده في ستور محترم  
الآنسة أشكيناز: بردو لأ... «Forget it»... متحاولش  
أنا (في سري): طب خلاص... أنا قررت ألعب معاكو... لو غلط  
هنف في هدومكو... ولو صح هعمل عليكو «بي بي»... اعتقد  
كده «Fair»

للأسف دورهم جه قبل ما حد يتف على الثاني..... كل ما  
سبق مش مهم... إنما السؤال المطروح على الساحة: هو لو  
«توتو عضلات» ده يبقى حبيب «سو»... يبقى «اشكيناز» هنا  
دورها إيه في العلاقة ؟؟؟!!..... «محرم» مثلاً.



# (احتفالية عيد الأم)

الفصيلة: زومبي هجين

المكان : محمصات صلاح الدين

التوقيت: صباحية عيد الأم

الأبطال: زمرة من خيرة زومبي المحروسة

وصف المشهد: صفوف تقبع خلف أكشاك اللب الأبيض واللب السوبر والفول السوداني في انتظار دورهم.... كما لو أن عادات المصريين تحولت ليصبح عيد الأم يوم قزقزة اللب وتقشير السوداني (وأنا اللي قلت أعمل حاجة جديدة وunique وأجيب معايا محمصات كجزء من الاحتفال)



الحوار:

زبون ١ (الرجل العجوز): هو فيه إيه النهاردة ؟

زبون ٢ (الشاب العضوي): مش عارف والله..... تقريباً الناس كلها وقعت على دماغها النهاردة واتلخبطت.... فاكرين النهاردة شم النسيم مش عيد الأم

أنا (في سري): ده على أساس إن انتوا الاتين واقضين عند  
فسخاني "شاهين"

زبون ٣ (الزوج): هو بس كل ما في الموضوع إن أطقم الكبايات  
والحلل التيفال والشنط الجلد والبارفانات أسعارها بقت مولعة  
زبونه ٣ (زوجة زبون ٣): وبقت موضة قديمة كمان

أنا (في سري): انتي شكلك كده بتشتري لحماتك وإن انتي  
صاحبة المشورة على جوزك "زبون ٣"

زبون ١ (الرجل العجوز): يعنى إنتوا رايعين تجيبوا لأمهاتكوا  
اللي تعبانين فيكو "لب" و"سوداني" !!!

زبون ٢ (الشاب العضوي): وكاجو يا حج

(يضحك الجميع بما فيهم العجوز والعبد لله)

زبون ٢ (الشاب العضوي): لا يكلف الله نفساً إلا وسعها

زبون ١ (الرجل العجوز): لأ...صحيح والله.... جبت لوالدتك  
إيه ؟

زبون ٢ (الشاب العضوي): والله جبت يا حج....جبت شروة كيوي  
وتفاح وكاكا

زبون ١ (الرجل العجوز): كاكَا ؟

زبون ٢ (الشاب العفوي): آه والله...أمى بتحبها

زبون ١ (الرجل العجوز): وحضرتك ؟

زبون ٣ (الزوج): والله أنا كفاية إنى موجود يا حج... أنا هديتها

(زبونه ٣ (زوجة زبون ٣) تسخسخ من الضحك)

زبون ١ (الرجل العجوز) مبتسمًا: وإنت ؟

زبون ٤ (شاب في السبعثشرات): أنا إشتراكتها في جيم

(يضحك الجميع للمرة الثانية بما فيهم العجوز والعبدالله)

زبون ١ (الرجل العجوز): انتوا عارفين إحنا كنا بنجيب إيه

لامهاتنا زمان...أنا فاكر جبت لأمى مرة تابلوة حيطة مرسوم

بالزيت كان بجنيه ونص...و جبتلها مرة تانية طقم ذهبي ١٥

قطعة ب ٥٧٠ قرش...بس ده قعدنا نحوش في تمنه انا واخواتى

الزبون ٣ (الزوج): يا نهار ابيض... انت عارف يعملولهم كام

دول دلوقتى يا حج !

الزبون ١ (الرجل العجوز): وكنا بنجيب سلاسل ذهب وحلقان

زبون ٢ (الشاب العفوي): "سلسلة" ولا "دلالية"...أصلها تفرق

(يضحك الجميع للمرة الثالثة بما فيهم العبدلله... العجوز لأ)

زبون ١ (الرجل العجوز) بجديّة وغضب: "ماشاللّه" على بعضها

زبون ٤ (شاب السبعثشرات): هو إنت عارف الأول كيلو اللب

الأبيض عاملوا كام يا حج ٤... ب ٨٨ جنيه

(تتغير ملامح الرجل العجوز ويرحل في صمت تاركاً مكانة

في الطابور في ظل اندهاش الجميع... يبدو أنه لم يكن على

دراية بالأسعار..... واضح أنه أول مرة يشتري تسالي منذ

عهد سحيق... كسرنا فرحته نحن معشر الأوغاد)



# (ملاحمة القناديل المضيئة)

الفصيلة: زومبي هجين

قررت أخذ يوم أجازة... وأحضر مراسم استخلاص الرخصة  
بنفسي.. فحدث ما كنت أخشاه:

بعد خوض غمار العديد والعديد من الإجراءات القانونية  
والمعاملات الورقية ومطاردة استمارات من كل صوب وحب  
ومهاطرات ودفق فواتير خلال أماكن متفرقة في أرجاء المعمورة...  
في النهاية تم إعلامي أن انتظر استلام الرخصة كخطوة أخيرة  
نحو المجد والتتويج بأكاليل النصر والعزة... فشاء القدر أن  
أختار موقع استراتيجي... فمع حرارة الشمس ومشاهد العرق  
المنسال وأهات الجماهير المحترقة سلفاً... أصبحت محاطاً  
بكوكبة من ألمع نجوم المجتمع... حيث:

أحاطني من اليمينه رجل كبير هادئ بلغ العرق حلقه فحوله  
لوجه كئيب عابس... وكان خلفي شابين تصاحبهم ثقليعه  
الشعر الشهيرة ذات القوام الرأسي الحاد والأجناب المستوية...  
فدار بينهم هذا الحوار الممتع :

شاب ١: شفت حوار القناديل اللي ردمت الساحل الشمالي  
وإسكندرية

شاب ٢: آه ده أنا سمعت أن الدنيا هناك مليطة... محدش بيعتب  
نواحي البحر

شاب ١: بيقولك بتترمي على الشط بعد الفجر بالزوفة

شاب ٢: المشكلة إنها سامة... وبيقولك لسعتها مؤذية

شاب ١: مش كلها.... فيه وفيه

شاب ٢: فاكر ياض القناديل اللي كنا بنصطادها زمان في ميامي  
ونرميها في نص الطريق بتاع الكورنيش

شاب ١: آه... يالهوي... دي كانت أيام

(في هذه الأثناء كان الرجل الكبير (اللي على الميمنة) يتابع  
حديث الشابين بابتسامة على وجهه ربما لاستحقاره إياهم أو  
ربنا لإعجابه بصلب الموضوع أو ربما وجد في حوارهم العزاء  
لهذا الحر الملتهب... المهم أنه بمجرد أن ذكرت مأساه إلقاء  
القناديل في الطريق في ميامي التفت إلى الشابين )

الرجل الكبير: هو أنتوا بقى اللي كنتوا بتصطادوا القناديل  
وترموها في الشارع والعرييات تدهسها

شاب ١: أيوه يا حج.... بس ده زمان... أيام الشقاوة

شاب ٢: معلش يا حج بقى... كان طيش شباب

**الرجل الكبير:** أهو القناديل انتقمت منكوا... بترييكوا دلوقتي...  
ومفيش دكرعارف يبيل رجله حتى

**شاب ٢:** آه والله يا حج

**الرجل الكبير:** أنتوا عارفين إن القناديل فيها خير كثير...  
ثروات مهدرة في الأرض

**شاب ١:** إزاي يا حج ؟

**الرجل الكبير:** برة... بيستخلصوا منها مواد كثير... بيتعمل  
منها كيماويات وأدوية وداخلة في صناعات كثير.

**شاب ١:** يالهوي... علياً النعمة إحنا مش وش نعمه

**الرجل الكبير:** الأنح بقى... عارفين الحريم اللي بتنفخ وتطلع  
في التلفزيون وتبقوا هتربلوا عليهم... أهو المواد اللي بينفخوا  
بيها جاية من القناديل دي.

**(يضحك الشابان)**

**شاب ٢:** نهار أسود... إيه ده يعني طلغوا بيحقنوا قناديل في  
الأخر.

**شاب ١:** أتاري المسائل بتبقى آخر لظلظة والواحد مكنش فاهم  
التيتة

(تتعالى ضحكات الثلاثة مع آخر تعليق)

الرجل الكبير: ده غير بقى إن فيه دول بيكلوها

شاب ١: أنا سمعت إن في الصين فيه مطاعم مشهورة متخصصة  
في أطباق قناديل البحر... بيعملوها ببهارات وحبشكنات

شاب ٢: أنا أمي اتفرجت على واحدة في التلفزيون طبخته على  
الهوا بالبيض والبقسماط على «CBC» سفرة

شاب ١: طب ما تيجي نطلع طلعة ونصطاد لنا كام واحد وأمك  
تطبخهم لنا

(يبتسم الرجل الكبير ويضحك الشاب ٢)

الرجل الكبير: إلحقوا اطلعوا بقى... قبل ما المطاعم تخلّص  
عليهم

الشاب ٢: أنا سمعت إن الحوار خلص خلاص ومفيش قناديل  
اليومين دول

شاب ١: إيه ده إزاي... إيه اللي حصل ؟

شاب ٢: بيقولك نزلهم سلاحف... قالك السلاحف بتتغذى  
عليها



(هنا انتفضت من مجلسي وغادرت وتمنيت في تلك اللحظة لو  
كان المعلم رشدان حيًا... لأزاح غطاء البيارة وخرج منها  
ليسفك دماءكم أجمعين دفاعاً عن سمعه أبناؤه بالتبني)





# (العيد فرحة... يا سلام ؟)

## الفصيلة: زومبي جيل رابع

لأننا في عيد... يعني بمب وفراقيع وحاجات بتضيع كان فيه جروب جميل من شوية مراهقين... لابسين اللي على الحبل... المسابير للموضة طبعاً... كانوا كوكتيل عجيب... ما بين ولاد وبنات وصنف تالت غير محدد فسيولوجيا (بالنسبالي على الأقل)... المهم أنهم كانوا واقفين في رقعة داخل أحد الكومباوندات المحترمة... واحد من الذكور عمال يفرقع صواريخ في البنات... اللي بدورها بتصدر صرخات عالية يعقبا ضحكات غير مبررة... ظل سياق الهزار مهيمن على الأحداث إلا أن ثارت إحدى فتيات الجروب على الأوضاع وقررت مواجهة أحد المفرقين:

فتاة الشلة: بودي...بس بقى... That's enough

المفرق: انسى... ده أنا لسه معايا علبتين كمان

فتاة الشلة: طب «I swear»... لو فرقت فيا حاجه تاني...

هعملك «Watch» في خدك



صاحب المفرقع: اجري يا معلم

(واذ فجأة... لقيت الاتنين... هو باااااااا)

أنا (في سري): عاش الرجالة!



رسالة إلى كل أب... وإلى كل أم... بل إلى كل ولي أمر  
أرجوكم... بلاش تسيبوا ولادكم لوحدهم في العيد مع بنات...  
هترجعوا البيت تلاقوهم معضوضين من خدودهم بأحمر شفاه  
وجيب الجينز اللي ورا متفرقع ومحروق... فأرجوكم... بلييز...  
Take care على عيالكو (ولادكم أمانة..... اللهم بلغت... اللهم  
فاشهد)





# (الثقافة الجنسية.. مطلب قومي !)

الفصيلة: زومبي هجين

أثناء إحدى مرات الإستعانة بأوبر..... حظيت برفقة طيف من الأطياف العابثة بهذا الكون المترامي الأطراف... سفير من كون موازي يبعد عنا أكثر من ١٤ مليار سنة ضوئية!! بل نستطيع القول أنه روح هائمة في فرسخ من فراسخ الفضاء الغير محده فلكياً.

الشهادة لله أنا افكرت في الأول أن الواحد من كثر الإرهاق اللي فيه... فنعس شويتين... فحلم حلم في السريع... لكني اصطدمت بمرارة أن ما يحدث حقيقي وواقع ملموس..... وإليكم تفاصيل ما حدث:

الطيب الزمكاني: على فين إن شاء الله ؟

العبد لله: الداون تاون

الطيب الزمكاني: من عينيه... كويس إن حضرتك كلمتني...

أصل ال «جي بي اس» كان هيتوهني

أنا: آه... ما أنا عارف...عشان كده بتكلم في التليفون

**الطيب الزمكاني: زباين محترمة والله العظيم**

**العبد لله: حبيبي**

**الطيب الزمكاني: أصل أنا ده أول يوم ليا شغل**

**العبد لله: ربنا يوفقك**

**الطيب الزمكاني: أنا كنت شغال أصلاً HR في شركة... بتاع ثلاث سنين... والشركة صفت أعمالها وقفلت... بس فبدل ما أقعد في البيت كده زي خيبته... نزلت أشوف حوار أوبر وكريم ده**

**العبد لله: برافو عليك... ربنا يجعلها فاتحة خير عليك ويسر لك الأمور**

**الطيب الزمكاني: بس عايز اقول لحضرتك يعنى... إنت زي أخويا طبعاً وليا الشرف... إن العيلة عندي كلها كانت معارضة إنني أشتغل الشغلانة دي**

**العبد لله: مالها الشغلانة دي !!؟؟**

**الطيب الزمكاني: يعنى بردك اسمك سواق... لو رححت تخطب ولا حاجة... هتتقدم تقولهم إيه؟**

**العبد لله: يا باشا إحنا هنا بس اللي مزودنها حبتين... ماله السواق... مش أحسن ما تقعد عاطل... وبعدين إنت سواق على عربيتك... أल्ली هي ملاكي كمان مش أجرة.**



العبد لله: ولا صعب ولا حاجة... اللي تكسبه أعبه

الطيب الزمكاني: صح... وطول ما التلاجة ما فيهاش حاجة...  
اشتغل أي حاجة

العبد لله (بصوت أحمد شفيق): إيه؟

الطيب الزمكاني: بس برده يا هندسة... مجال الأي تي ده مشاع  
الصراحة... يعني ولا مؤاخذة أي حد مش لاقى شغلانة... يقوم  
لاضم في الأي تي

العبد لله: لا يا راجل... مش أوي كده (في سري: اربط بقى  
بدل ما زعلك)

الطيب الزمكاني: طب والله العظيم زى ما بقول لحضرتك كده

الطيب الزمكاني: أنا صاحبي خريج تربية رياضية... زي الفحل  
ما شاء الله... بتاع رفع أثقال... شغال «أي تي» دلوقتي

العبد لله (مع بداية تغيير في ملامح الوجه): شغال إيه معلىش  
في ال «أي تي»

الطيب الزمكاني: انستراكتور تقريباً

العبد لله (أيه سفن أيه): بيدرس إيه على كده بقى ؟

الطيب الزمكاني: برمجة





# (الغيارات متعددة الاستخدامات)

## الفصيلة: زومبي جيل رابع

إعتقاد خاطيء...راسخ في أذهان البعض... ألا وهو أن الزومبيز زيهم زي الشياطين... بيتسلسلوا في رمضان... لكن للأسف هذه القاعدة اتسفت على يد زمرة من خيرة شباب الزومبيز... عددهم لم يتجاوز الخمس مراهقين... جلسوا بجانب بعد صلاة القيام على أحد المقاهي.

زومبي ١: إنت مجتش النهاردة ليه ؟

زومبي ٢: مفيش يا عم... صحيت الصبح مترمل وجسمي مضحح

أنا (في سري): «مترمل»... إنت بتسيح زبده يابني ولا ايه

زومبي ٢: ايه أخذتوا حاجة مهمة النهاردة

زومبي ١: فاكس.....هجايص كل مرة

زومبي ٢: أنا بقى يا معلم صحيت لك على الساعة ١٢ الظهر... تصادف أن النهاردة اليوم اللي بتجيلنا فيه واحدة عشان تتضف.....طبعاً لقيتك الدنيا مراجيح

زومبي ١: خش نام تاني لحد ما تخلص...أنا اليوم اللي بينضفوا فيه الشقة ده بفضل مانتخ على السرير لحد ما يخلصوا على العصر

زومبي ٢: ما أنا كنت هعمل كده... بس اتزنتت... أعمالها فين... كان لازم أروح الحمام

زومبي ١: خفيف ولا ثقيل يا شقو ؟

زومبي ٢: خفيف يا صاحبي

زومبي ١: طب يا عمنا... سلك نفسك في الفيفتي فيفتي

زومبي ٢: اتقل بقى... ما أنا لقيتك الحمام مليطه... الغسالة شغالة والخرطوم بتاعها محطوط في ال toilet... قلت أعمالها في البانيو... لقيتهولك منقوع فيه سجاجيد... بس بقيت على أخرى... والمثانة كانت خلاص هتتفجر... قلت بس إما النصر أو الشهادة... هعملها في الحوض

زومبي ٣: الله يقرفك

زومبي ٤: ضحك السنين

زومبي ٣: هو يوم التتضيف ده أساساً بيبقى يوم أوملت وما ينفعش تقعد في البيت

زومبي ٢: فكك... مش دي التيتة خالص... لمحتك إيه بقى يا معلم وأنا شغال بسقى الحوض؟

زومبي ١: إيه؟

زومبي ٢: لاقيتك الكاوتشا اللي في الحمام ملفوف بيها قماشه كده... مفحوته طبعاً وطالع عين أبوها... المهم فضلت أشبهه عليها... لحد ما الفضول قتلني ورحت فكّتها من على الكاوتشا... ألاقيهالك إيه بقى

زومبي ٣ (متشوقاً لسان حال الجميع): إيه؟؟؟

زومبي ٢: ألاقيه البوكسر بتاعي... لأ وإيه... جديد وكنت لسه شارية

زومبي ١: يا ديني على الضحك

زومبي ٢: بص... نسيت إنى مزنوق ونسيت أي حاجة وأخذت الكاوتشا وطلعت من الحمام جري... لقيت أمي قاعدة على كرسي السفره وعاملة تدي توجيهات وتعليمات لست... المهم... قمت رافع البوكسر كده قدامها وبقولها... مش ده البوكسر بتاعي برده... قامت ردت عليا بمنتهى الثبات الانفعالي اللي في الدنيا وب «Pocker Face» عجيب... هبقى اشتريك واحد تاني... والست عمالة تكنس وهاتك يا ضحك في سرها



زومبي ١ مبتسماً: أمك بتقلّبك يا معلم

زومبي ٢: واللّه بص... كنت في اللحظة دي عايز أجري على الوليّه دي وهي بتضحك وأقوم خنقها بالبوكسر وملبس الجريمة في أمي

زومبي ٣ ساخراً: اللي يتقلب في بوكسراته يتقلب في أي حاجة



رسالة لقطونيل ودايس (بصوت عم ضياء): كفاية صرف على إعلانات ودعاية... آخرتها زي ما انتوا شايفين: يا ملفوف على كاوتشا بدل الشرشوبة... يا ممسحة مطبخ... مش دايمة لحد... هم مترين في متر

(عشان كده: الأمبراطور... الأفضل للرجال)





# (أحمد فؤاد نجم التاكسيات)

الفصيلة: زومبي هجين

الساعة: الثانية بعد منتصف الليل (بتوقيت رمضان)

المكان: الداون تاون... التجمع الخامس

الوصف: أفواج من الشورتات والفانلات الكت والتتورات القصيرة والجينزات المثقوبة عمداً

التفسير: رمضان بقى وسحور وكده.... وكل سنة وأنت طيب

الحدث: بعد فشل كل محاولات استدراج كريم أو أوبر.....أما لعدم وجود سيارات في هذه الساعة المتأخرة أو للمبالغة غير مبررة في عامل الذروة اللي وصل لأكثر من ضعف الفاتورة.

المهم: بعد نصف ساعة من الانتظار يعقبها وصول المدد... فارس أبيض من أشرف بنى زومبي... يمتطى تاكسى ابيض ماركة (ابنى حلمك) قصدي BYD .... مركب فرعين كهارب من الجناب... عشان رمضان بقى وكل سنة وإنت طيب بردو

المهم اعتبرته وسيلتي لبلوغ الهدف.... اللي هو «المنزل» ولكن  
كعادته معي... لم تمر الأمور مرور الكرام... فحدث الآتي:

**الفارس الأبيض:** كل سنة وحضرتك طيب

**العبد لله:** وإنت بالصحة والسلامة يا حبيبي

**الفارس الابيض:** الدنيا سهاري... ولا كأنها الساعة تسعة

**العبد لله:** آه... رمضان بقى

**الفارس الأبيض:** عارف حضرتك... أنا شغال من ثمانية الصبح

**العبد لله:** يا نهار أبيض... الله يعينك

**الفارس الابيض:** الله يخليك... أصل زميلي اللي بيبدل معايا

على العربية... اتكعبل في السلم ورجليه اتكسرت

**العبد لله:** لا حول ولا قوة إلا بالله..... ربنا يعافيه

**الفارس الابيض:** آه والله... وبقيت شايل أنا الشيفتين... بتاعي

وبتاعه..... الراجل فاتح بيت برده وعنده قرطة عيال

**العبد لله:** ربنا يديك الصحة ويقدرك دايماً على فعل الخير

**الفارس الأبيض:** الشهاده لله... هو بردك كان شالني مرة... لما

المدام عندي كانت بتولد... والولادة كانت متعثرة حبتين

العبد لله: الصحاب الجدعان نعمة

الفارس الأبيض: بس هم فين يا باشا... من بعد ما «عشري»  
خان إبراهيم... مبقوش موجودين

العبد لله: (WTF)... إنت بتقول إيه ؟

الفارس الأبيض: مفيش حاجة مضمونة اليومين دول

العبد لله: صحيح

الفارس الأبيض: والدنيا لو فيها أمان... مكنش «حبيشه» قتل  
«حنان»

العبد لله: إيه يا عمنا.... إنت مقضيها مسلسلات ولا إيه

الفارس الأبيض: هع هع هع.... خلاصة اللي عايز أقوله... أنها  
أرزاق... كله محفور له رزقه... كام؟... وإمتى؟... وإزاي؟...  
محدث هياخد رزق حد

العبد لله: صح... الله يفتح عليك

الفارس الأبيض: عارف حضرتك من ساعة حوار شركات  
السيرفيس اللي نزلت البلد دي..... «أوبر» ولا «كريم» ولا  
«Easy Taxi» دول

العبد لله: تمام



الفارس الأبيض: لسه كنت عند واحد صاحبي معزوم على  
الفطار.... المهم فطرنا وقعدنا مع بعض شويتين.... وقولتله  
هخلع أنا بقى... قالي هتروح إزاي... قولتله مش هغلب  
يعني.... هاخذ أي مواصلة.... قالي مواصلة إيه...عليا الطلاق  
ما يحصل... قام مطلع موبايل قد فرده الشبشب ولعيلي  
فيه بصوابعه كده... وقالي ثواني وعربية هتبقى تحت البيت  
المعفن اللي أبوه مكنش يعرف الدش غير في الدومينو.... وعياله  
بيتسرحوا بفرشه بلاط

العبد لله: (صمت القبور)

الفارس الأبيض: بص يا باشا... إحنا شعب بتاع فشخرة.....  
غاويين منظره.... نموت في الأفوره...و الله مسخرة!!  
(ثم يضحك ضحكات شريرة مكتومة).... حبه شعر حلوين أهم

~~~~~  
(على غرار ما يقال في مثل تلك المواقف زي «أنا هفطر  
عليك»... الراجل ده أنا اتسحرت عليه)





# (حديث الساعة)

## الفصيلة: زومبي جيل رابع

في أحد الأيام القليلة من أيام رمضان التي بلغت درجة الحرارة ذروتها... تجمعت عناصر من فصيلة نادرة من الثدييات الذكورية على المقهى... وتناولوا أطراف الحديث... وكان محور الندوة الثقافية يدور حول أحد أهم القضايا الشائكة... التي عجز جمهور الفقهاء عن إعطاء رأي فاصل فيها..... ما تيجي نشوف:

شاب ١: أنا بسيح ولا إيه يا جدعان؟

شاب ٢: الجو جحيبييم

شاب ٣: إحنا تقريبا بتردد على الساخن

شاب ٢: أنا عايز أقولك... أنا كنت بصوت النهاردة في الحمام... من الشطافة

شاب ١: صحيح يا جدعان... هو حوار الشطافة ده طلع بجد ولا بلح؟

شاب ٢: شطافه إيه !!؟

شاب ١: قالك الشطافة بتفطر

شاب ٢: ده مين اللي قال كده ولا مؤاخذة؟!؟

شاب ١: تقريباً... مذهب من المذاهب

أنا (في سري): شطافة!!... مذهب!!... ويحك

شاب ٣: مذهب مين؟

شاب ١: مش فاكر... بس هو واحد من التلاتة المشهورين

أنا (في سري): تلاتة!!... فلتصحبكم اللعنة أينما حللتم

شاب ٢: يا عم الحوار ده اشتغالات

شاب ٣: طب ما صحيح يا جدعان..... ما هي ميه بتدخل

الجسم.....اشمعنى بقى

شاب ٤: يا بني مش دي الفكرة.....المية اللي تخش من بقك ولا

مؤاخذة... هي دي اللي بتفطر

شاب ٢: انت بتهلك في إيه ياض منك له... هو كان فيه شطافة

أساساً زمان

شاب ٣: إيه ده !!...لأ ثانية واحدة بقى.....هو مكنش فيه

شطافة زمان

شباب ٤: طب يا جدعان... أنا عندي سؤال وجودي من وأنا  
في خامسة ابتدائي... ومحدث إداني فيه إجابة شافية... هو  
الناس زمان كانوا بيعملوا حمام فين وإزاي... وكانوا بيتشطفوا  
إزاي بردة؟

شباب ٢: عادي زي الناس

شباب ٤: زي الناس إزاي ومكنش فيه ولا كابينييه ولا سيفون ولا  
ميه

شباب ١: مكنش فيه ميه إزاي يعنى... كان فيه ميه طبعاً... كان  
عندهم أبار

شباب ٤: يعنى كانوا بيعملوها في الأبار اللي ييشربوا منها... أنت  
عبيط يا ضة!!!

شباب ٢: أكيد لأ يا جاموسة... كانوا يملوا ميه من البير  
ويستخدموها عادى

شباب ٣: أنا أسمع إنهم كانوا بيعملوها في الصحرا... بيعملوا  
حفرة ويعملوا فيها وبعدين يردموها بالرمل.

شباب ٤: حفرة إيه ويدفنوا إيه !!... إنت بتتكلم عن قطط وكلاب

شباب ٢: يعنى إنت عايز تقنعني إن أي حد كان بيتزنق فيهم...

كان يخبط مشوار لحد الصحرا عشان يعمل «كي كي» ولا  
«يورين» ويرجع بيته تاني صد - رد

شاب ٣: مشوار صحرا إيه ياض يا شلحف... هم كانوا عايشين  
في الصحرا أساساً

شاب ١: يعنى إحنا سيينا أم التاريخ كله... وينشوف دلوقتي  
الناس كانت بتشخ إزاي.... الله يحرقوا... ده الكلام نفسه  
ريحته نشعت

أنا (في سري): أخيراً عاقل في المجلس

وهكذا انتهت الندوة الثقافية ببعض النقاط الهامة.... على  
سبيل المثال لا الحصر:

- المذاهب عندنا ثلاثة.... دول المشهورين
- الشطافة مش بتقطر... إلا لو شربت منها
- الناس زمان كانوا زي القطط والكلاب... بتخبط مشوار  
للصحرا... تعمل حفرة وتملاها كي كي وبعدين تردمها...  
وتحط شاهد قبر:

«هنا ترقد فوارغ الغداء/العشاء»



# (أخذ الناقة... وشرح)

## الفصيلة: زومبي ميتافيزيقي

كان عندي حزمة مشاوير.... قلت يا واد ريح من السواقة شوية وقضيها (أوبر - كريم) عملا بالمقولة الشهيرة (هين قرشك ولا تهين نفسك).....الحصيلة كانت ٣ مشاوير.... في المشوار الأوسط اللي فيهم عجزت عن إيجاد أي كريماوي او أوبراوي.... ربما لوجودي في منطقة شبه عشوائية.... فاضطرت أسفاً أن ألجأ إلى الفلوكة البيضاء... ومع أول فلوكة وقفت تبعاً لإشارتي.... قمت راكب.... كانت سيارة فيرنا أشبه بجثة كلب نافق مات بواسطة ورك فرخة سبايسي ومسموم

**المهم**.... بمجرد ما ركبت الكلب قصدي «الفيرنا» كانت عيون السائق تلاحقني من خلال المرأة الأمامية... عملت عبيط وتجاهلت تلك النظرات الثاقبة المريبة.... مفيش ثواني من بعد انطلاق السيارة اشتممت رائحة فردة «باتا» شمال اتلعب بيها (٥٠) مطش متواصل وملبوسه من غير شراب كمان.... المهم إن السائق لاحظ ما أصابني من ضيق وغضب.... قام ابتدى يخلق مساحة تعارف ويفتح سكة للنقاش:

السائق: ما هو أنا كنت عايز أقولك من الصبح....تعالى اقعد جنبى هنا

العبدلله: هو إيه الريحه اللي ورا دي !!؟

السائق: هتلاقى حد من الزباين ولاد الصرمة جزمته اتعكت في خري وقام مسحها عندي

(فجأه... قام راكن على جنب )

السائق: تعالى اقعد جنبى هنا يا هندسة

(نظراً لنفاذ الرائحة قمت بمنتهى السمع والطاعة طالع جنبه قدام)

العبدلله: آه...لأ...الدنيا هنا ارحم كثير من ورا

(فجأة وبعد أن أعطى غيار أول بيده اليمنى لقيته يقبض على فخذ العبدلله الأيسر)

السائق (بابتسامة شريرة): القعاد ورا ده للحريم بس.....  
الرجالة بتقعد جنب السواق

(طبعا الموضوع مش محتاج مقدمات ولا استنتاجات ولا فقاقة.....كانت واضحة وضوح كريستال عصفور....إن فيه

ريحة حاجة شمال تجوب في الأفق)

العبد لله: لا والله يا أسطى.... عادى... هي بس «الفيرنا» كنزة  
شوية... وزى ما أنت شايف كده الواحد برده مليون حبتين....  
بس فبقى مش عارف أقعد براحتي... خصوصاً قدام... إنت  
عارف بقى الفتييس مع المانوال حوار

السائق (بمعالم متحرش تعاطى جرعة فياجرا طازجة): ده  
أحلى ناس المليانيين دول... زي العسل

العبد لله (بغضب داخلي عارم): (في سري دعاء كظم الغيظ:  
الله صبرني حتى لا أقتل أحداً من عبادك)

السائق (بنفس الابتسامة الشريره ونظرات معمصمة مصحوبة  
بغزل صريح): لا يا هندسة... ولا يهملك... واسعة وبراح أهى  
(المهم لأنى لم تتاح ليا الفرصة لكي أرى ملامحه جيداً أيام لما  
كنت قاعد ورا... بصعودي للمقصورة حظيت بوقت كافي لأتفقد  
معالمه بدقة... فكان وصفه كالآتي: رجل في الخمسين... بددين....  
يرتدي قميص مفتوح... شعر صدر كثيف... كان لعبه يتراقص  
بين ثنايا فمه وهو يتحدث ويلمع بريق من خلال ثغرة اتضح  
فيما بعد أنها سنة ذهبية تلمع وسط عتمة أسنان طفح عليها  
التدخين سواداً عارماً.... و بعد دقائق من الجفاء والصمت)

السائق ( يقبض على الفخذ الأيسر للمرة الثانية): الباشا  
مش من هنا ولا إيه ؟

العبدلله (بغضب): إشمعنى

السائق (باطراء): حاسك كده ابن ناس

العبدلله: الله يخليك... كلنا ولاد تسعة يا حج

السائق ( يغمز بإحدى عينيه): أنا ابن سبعة على فكرة.

العبدلله: (استغفر الله العظيم.... وبعدين بقى... شكلك  
هتغسل وتدفن النهاردة)

(وقفنا في إشارة....قمت لقيته بيدور وبيجيب حاجة من  
ورا....فإذ به يمسك زجاجة بها لبن....ففتحها ونهم منها  
كمن عصف به العطش في بيداء مقفزة.....و بعد ان ارتشف  
منها الكثير....همّ بمسح بقايا اللبن المتعلقة بفمه....ثم  
عرض عليا البعض)

السائق: تدوق يا هندسة

العبدلله: ايه ده ولا مؤاخذة.

السائق: حليب ناقة.

العبدلله: مين ؟

السائق: لبن جمل بس نتايه... بيحبوها زيها زي الجاموسة

العبدلله: لبن جمال !!

(تقلصت أمعائي من فرط الإشمئزاز ودفعت يده المتشبهه

بزجاجة اللبن)

العبدلله: تسلّم... ماليش فيه والله

السائق: يا هندسة... ده يرم عضمك ويخليك إكسرا

العبدلله: ألف شكر!!

السائق: ده العرب كانوا عايشين عليه

العبدلله: معلش...معلش....إحنا فين والعرب فين

السائق (يقوم بغلق الزجاجاة): بشوقك.....عايز أقولك بس...

إن الفتوحات الإسلامية لأوروبا وأمريكا....كان أساسها إن

العرب صحتهم حلوة... التخين كان بيخشع قدامهم.... بسبب

لبن الجمال ده... وكتاب الله ما حد عارف قيمته

العبدلله: فتوحات إسلامية!!!..... وأمريكا !!!!!!..... الاتنين

(يعنى متحرش وأهبل كمان)





# (بويكا... وفورمة الساحل)

## الفصيلة: زومبي الجيل الرابع

في أحد ليالي الشتاء الباردة.... طقت في دماغ العبد الفقير إلى الله.... إنى أروح سينما.... المهم كنوع من أنواع العقاب الديوي.... تشاء الأقدار أن أحجز في رقعة ظننت أنى في منأى عن الصداق والزحمة.... فإذ بي أحظى بشرف صحبة أربعة شباب (٢❖٢) يعني ما يعادل «Two Couples».... طبعاً خلاص بقى مش هنهري كثير بقى في حوار اللبس ده... عشان خلاص.... قضى الأمر.... بس هخص بالذكر أستاذ «بويكا» (أصحابه مسيمينه كده)... الشهادة لله... الواد حالق حلقه «بويكا» بالزبط ولاعب حبه جيم حلوين وتقريباً ضارب حقن هوا في بعض العضلات خصوصاً الجناحات والصدور (سبايسي ومتبلة آخر حاجة)..... المهم.... السلوك كان مزيج ما بين انعدام التربية وفقدان ركائز الأخلاق..... يعني منذ البدء تم وضع الأقدام على حافة المقاعد اللي قدامهم.... مرورا بالسخرية من بعض الأشخاص الموجودين.... انتهاء بهذا الحوار:

شاب couple رقم ١: حلوة الفورما دي يا «بويكا»

شاب couple رقم ٢: أهو.... الصيف داخل بقى يا معلم

العبد لله: (بويكا !!.... ماشى)

شاب couple رقم ١: إنتوا عارفين الراجل ده عمل إيه عشان

يجيب المقاسات دي

العبد لله: (إنت شكلك ياض إنت منفسن..... اكمنك سفروت)

شاب couple رقم ٢: اه والله..... ده انا ببات في الجيم

شاب couple رقم ١ (المنفسن): ده انجيكشن ولا مكملات يا شقو

شاب couple رقم ٢: لا يا ريس... ماليش في الانجيكشن

فتاه couple رقم ٢: بس أنا مش بحب ال «Muscles» المنفوخة دي

شاب couple رقم ٢ (بنحنة متعمدة وابتسامة سخيفة على

الوجه): ليه بس ؟

فتاه couple رقم ١: مي تو على فكرة... شكلها بيبقى مش حلو

فتاه couple رقم ٢: ال «Size» الأوفر ده مش بحبه

شاب couple رقم ٢: طب تحبيه ايه ؟

فتاه couple رقم ٢: أنا بحب ال «Muscle» تبقى «Rounded»  
كده وصغيره

العبد لله: (ايه ده ؟!!!!..... هم طالبين أوردر من كنتاكي ولا إيه)

شاب couple رقم ٢: خلاص... هزيطهاك

العبد لله: (إيه ده ؟!!!!..... بالسهولة دي... إنت فوتوشوب يالا)

شاب couple رقم ١: بص... أنا عارف دماغ البنات... هم

عايزين النص الفقاني «Rounded»... والنص التحتاني «Curvy»

العبد لله: (انتوا كده مش محتاجين مكملات... انتوا عايزين

«سيليكون»)

شاب couple رقم ٢: خلاص «Piece of Cake»... طب وبتحبي

السمانة شكلها إيه ؟

العبد لله: (أنا بحبها محروقة من على الحروف)



كده يبقى رسمياً فورمة الساحل خلاص مابقتش زي زمان:

«البنش بلاطة والبطن شيكولاتة»

فورمة الساحل بقت: من فوق «Rounded» ومن تحت «Curvy»

وما بينهما مثلج





# (الجمعة... الثالث عشر من أيلول)

## الفصيلة: زومبي ميتافيزيقي

دون الولوج إلى أي تفاصيل... امرأتان... متزوجتان... يجلسان على أحد المقاهي... ترتديان ذاك البنطال الممزق... تلتحف كل منهما بشال فوق جينز ممزق كلياً من منطقة الركبة... تقبضان على خرطوم حجرالشيخة الفاخر... بنكهة اللمون نغناع الشهية... وتناولوا أطراف هذا الحديث:

**مامي ١:** كنتى فين إمبارح يا بنتي..... قعدت أكلمك... «موبايل» و«SMS» و«واتس اب» و«ماسنجر»

**مامي ٢:** اسكتي.... إمبارح بجد... «It was a mess»

**العبد الفقير إلى الله:** (لا حول الله.... أكيد هتلاقي عشان الانفجار بتاع المطار... ربنا يستر وميكنش حد عندهم اتأذى)

**مامي ١:** إيه ده ؟! «What Happened»

**مامي ٢:** «نودي» رمى «Toy» من بتوعه إمبارح على التيليفيجن.... فاتكسر

**مامي ١:** «OMG»... طب هو كويس المهم

العبد الفقير إلى الله: (كويس إيه !!)... يا وليّه بتقولك رمى  
مش اترمي.... «نودي» هنا «قاذف» مش «مقدوف»)

مامي ٢: آه...هو «Fine» بس التيليفيجن طبعاً محطش منطق  
بعدها... المشكلة بقى في باباه.... طبعاً كان على آخره وقعد يزعق  
له وشخط فيه.... وأنا طبعاً مسكتش وقمت دبيت خناقة معاه  
مامي ١: عادي على فكرة... ال «Kids» على طول بتلعب وبترمى  
حاجات وده وارد جداً يحصل.

العبد الفقير إلى الله: (عليا النعمة انتي شكلك سينجل  
انديبندت... وهتسخني الوليه على جوزها)

مامي ١: طب هو التيليفيجن «Total loss» يعني ولا ممكن يتصلح  
مامي ٢: مفيش يا بنتي.... باظ خالص... المشكلة إنه كان لسه  
جاييه جديد عشان ال «World Cup»... حاجة كده حلوفة بتاع  
«٨٠» بوصة

العبد الفقير إلى الله: (٨٠ بوصة !!!)... احنا على أيماننا لو  
كان «نودي» كسر تلفزيون ١٤ بوصة بس... كنا قابلناه بتسديده  
مقصية بالأبجورة في دماغه رشق)

**مامي ٢:** بس يا ستي قعدنا نتخانق.... وأقوله الموضوع مش مستاهل تزعق في الولد كده... وهو مصمم إن الولد فيه حاجة وإنه ملاحظ عليه عصبية ونرفزة الفتره الأخيرة دي.... وإن رمى ال «Toy» على التلفزيون ده «Indication» أن الولد عنده بوادر اضطراب نفسي.... بلا بلا بلا

**مامي ١:** على فكرة هو أصلاً إمبراح كان «Friday 13<sup>th</sup>»... إنتى عارفة كده ولا لأ.... يعني الناس كلها أصلاً كانت مش في ال «Mode» وكان فيه كمية «Negative Energy» بالعبيط

**مامي ٢:** إيه ده بجد.... أنا من كتر الأيام ما بقت شبه بعضها... مبقتش أحس بيها

**العبد الفقير إلى الله:** (إيه ده !!) هو إيه «Friday 13<sup>th</sup>» ده ولا مؤاخذة... ده حاجة كده زي «البلاك فرايداي» بتاع جوميا)

**مامي ١:** يابنتي أيوة.... ال «Paranomal Activities» كانت «Too Active» إمبراح.... وكان فيه تقلبات مزاجية وحاجات كتير «Upnormal» بتحصل في اليوم ده

**العبد الفقير إلى الله:** ( إيه يا ولية الهتش ده.... ده إنتى ناقص تقوليلها إن «جيسون» بيظهر في «Point 90» بعد الساعة (١٢

**مامي ٢:** واللّٰه مش بعيد.... أنا ومروان أساساً اتخانقنا على  
مواضيع كلها تافهة

**مامي ١:** بس كده كده ما ينفعش يشخط في الولد.... مهما كان  
ال «Reason» إيه!

**مامي ٢:** أنا أصلاً ابن خالتي «Psychologist» وحذرنا أكثر من  
مرة من موضوع الشخط والزعيق في الأولاد

**العبد الفقير إلى الله (بصوت كابتن رضا عبد العال):** (وأنا  
بقى ابن عمتي «Egyptologist» وبقولك المصريين طوال سبع  
تلاف سنة ما ينفعش معاهم غير الشباشب الزنوبة

**مامي ٢:** صحيح يا سالي... بما إنك شغالة مع دور نشر وكده... ما  
تعرفيش أي «Book» يكون كويس في موضوع التعامل مع ال «Kids»...  
أنا عايزه حاجه كده مثلا زي «Kids Guide For Mommies»

**مامي ١:** أكيد... «Let Me Check»... وهرد عليكي بكرة

**العبد الفقير إلى الله:** (أنا معايا «دي بي إيفايه» بتاعه

«Kids Guide for Dummies»... تاكل معاكي)



يظل السؤال المطروح دلوقتي: هل الأوتاد الخشبية (أبو صليبة)  
وطلقات الفضة وعصير التوم لهم تأثير إيجابي على الزومبيز  
دول..... بتجيب معاهم يعني!!!





(٢٠١٨/٨/٨)

## الفصيلة: زومبي هجين

الحمد لله... نلت من الحظ جانب.... و «٢٠١٨/٨/٨» معدتش  
عليا من غير ما تحصل حاجة «Unique».... «Unique» آخر  
تلاتين حاجة.... والشهادة لله... الطلعة المرة دي الواحد مكنش  
محتاج إنه يضيف أي محسنات بديعية أو يلعب في الحبكة  
الدرامية بتاعتها.... كانت مستكفية ذاتياً بحيث تشكل بمفردها  
ملحمة مكتملة الأركان... عشان كده أنا اكتفيت بسردها كما  
هي... وإليكم بيان بما حدث:

فلاح صبور مكافح... إلتهبت وجنتاه وجف حلقه من أثر  
الحرارة العالية ينظر إلى العبدلله في انكسار: هو حضرتك  
رقمك كام ؟

العبدلله: أنا «٣٧٦»... و حضرتك ؟

الفلاح الصبور المكافح: أنا «٣٨٢»... طب هو هانت كده يعني  
ولا إيه ؟

العبدلله: والله هي اللوح الإلكترونية لسه عند «٣١٦»... فكده  
أعتقد لسه قدامنا حبه حلوين

**الفلاح الصبور المكافح: طب وهم شغالين باللوح دي يعني ؟**

**العبدلله (بسخرية):** المفروض... كلها ستين واحد ويجي دورنا (الفلاح الصبور المكافح ينظر إلي نظرة امتعاض مخلوطة بعتاب نتج عنه درزينة شتاييم وقفت في زوره وكان نفسه يقولهالي) وأثناء تلك اللحظات البائسة... يخترق المشهد شاب عفوي... مفعم بالغضب والهيبة غير المبررة.. ربما سمع بالمصادفة الحديث الشيق بيني وبين الفلاح الصبور فقرر أن يتدخل... ربما لإيضاح بعض النقاط:

**الشاب العنيف (تعجب استنكاري):** هم مين دول ولا مؤاخذة اللي شغالين بالدور !!؟

**العبدلله (عامل عبيط بقى وكلي ثقة في المنظومة):** أمال إيه؟... إيه الأرقام اللي معانا دي واللوح الإلكترونية دي لازمتها إيه !!

**الشاب العنيف:** باشا... أنا رقمي «٣٢٥»... وبقالي أكثر من ساعة واقف الرقم اللي على اللوحه ده متغيرش... واقف عند «٣١٦»

**الفلاح الصبور المكافح (بلهجه حادة):** ساعة !!

**الشاب العنيف:** إنتوا مش عارفين اللي فيها ولا إيه... إنت تدعك الفانوس... هتعدي حلاوة

**العبدلله (عامل عبيط للمره الثانيه):** إزاي يعني؟

**الشاب العنيف:** خمسينية وحطها في الملف..... وسلمه للموظفة  
من غير ما رقمك يجي.... كله بيعمل كده.... إنت فاكر الناس  
دي كلها واقفه مستتية رقمها

**الفلاح الصبور المكافح:** واللي معوش ؟

**الشاب العنيف:** ميلزموش... يتلَّح جنبنا هنا لحد ما يجي دوره  
(مندوب الكافتريا مخترقاً الجموع منادياً: **حد جعان ... حد  
عطشان ... حد ندمان**)

بعد الانتهاء من إستيفاء الأوراق وحصد الأختام... آن الأوان  
لجني الثمار واستلام الرخصة.. وتحت مظلة الخيزران وأيكه  
البامبو... يجلس الجميع متمنياً سماع اسمه في الميكروفون....  
وجدت مقعد خالي فهرولت إليه...فإذ بي أجدني أجالس  
(نفس الفلاح الصبور المكافح).... طبعاً مش محتاجة فقاقة  
هو كان رقمه «٣٨٢» وأنا رقمي «٣٧٦»...كونى ألاقيه قاعد  
مستتي استلام الرخصه قبلى ... مالهاش غير تفسير واحد  
إنه «دعك الفانوس».... المهم طال الانتظار فإذ بي أجده يشلح  
الجلابية ويربع نص تربيعه على الكرسي وخلع الشبشب من  
قدمه اليسرى الموجهه نحوى وهاتك يا «ماساج» فيها باستخدام  
يده اليمنى مصوحبة بكمية آهات وصيحات واستغاثات جسدية:

الفلاح الصبور المكافح: آه يانا يا امه.... آه يا جتتي يانى  
(العبدلله ناظرا الى اصابع يده المنغمسه بين أطراف أصابع  
قدمه)

الفلاح الصبور المكافح: يالهوي على ده مشوار..... آه يانا يا امه  
(ثم يتوقف عن الدعك واللعك ويخرج من جيب الجلابية  
ورقه مطوية.... ثم تحدث الفاجعة)

الفلاح الصبور المكافح: معاك قلم يا هندسة ؟

العبدلله (بعد مشهد ماساج قدمه تمنيت ساعتها أن أكون تلك  
الكلب البلدي المفترش أمام بوابة وحدة المرور): آه.... ثواني  
(المهم أخرجت له القلم..... وبعد أن رأيته يكتب بنفس اليد  
الأثمة التي داعبت وعبثت بأصابع القدم الشهية..... أقسمت  
أن أتنازل عنه... رغم إنه كان «Uni Pin» وبناء عليه بعد أن  
انتهى من الكتابه... شكرني ويده ممتدة لي بالقلم تاركاً لي  
ذكرى تفوح منه... فلم أتردد لحظة في عرض الهدية)

العبدلله: لا خلاص... واللّه ما هو راجع... خليه معاك يمكن  
تحتاجه تاني..... أنا معايا دسته في البيت

الفلاح الصبور المكافح: حبيبي يا هندزة... تسلم... أنا خلصت  
خلاص

العبد لله: وعزّه جلال الله ما هو راجع.... ده النبي قبل الهدية  
(مندوب آخر للكافتريا مخترقاً لجلسه: حد جعان وأسي.....  
حد عطشان وناسي)



إغلاق الستارة مع سحابه سوداء مفعمة بالتينيا وكوكتيل  
فطريات





# (العقل مال ... من الترجمة الشمال)

الفصيلة: زومبي هجين

الحمد لله الذي تتم بنعمته الصالحات... بعد ثلاث أيام من الشقاء... خلصت الرخصة «بما يرضي الله»... مع إنها كانت تخلص في ساعة زمن بما «لا يرضي الله»!!!! بس مش مهم... «Iam Happy» بصوت أبله ميرفت.

المهم إن الإحتفالية اليوم ده مكش ينفع تمر مرور الكرام..... فوقعت في اتنين مراهقين... حاجة كده من على وش قفص الزومبييز... الاتنين كانوا لابسين شورتات أقرب ما يكون للبوكسرات... واحد منهم تقريباً مچلچل شعره بتفافة صاحبه والتاني لما ريقه نشف وهو بيوجب مع صاحبه قام مچلچل شعره بزلال بيض بلدي... بصرف النظر عن ما سبق... الاتنين كانوا عند منطقة انتظار استلام الرخصة السابق ذكرها (مظله الخيزران وأيكه البامبو).... فدار بينهم هذا الحوار القصير والشيق للغاية

**كابتن تفافة:** شغلت الوصلة اللي اديتهاالك ولا لأ

**مستر زلال البيض:** آه يا عم... ده إحنا بقينا عايشين عليها

كابتن تفاعفة: يعني بقيت تعرف تتفرج صوت وصوره على  
التلفزيون

مستر زلال البيض: اه يابا... كله شغال

كابتن تفاعفة: الله عليك... اتفرجت على حاجه من اللي الافلام  
اللى اديتهالك

مستر زلال البيض: يا شقو... ده انا هاري ابويا وامى افلام

كابتن تفاعفة: (نغمات موسيقيه مصدرها الانف) ايه ده!!...  
انت بتتفرج مع ابوك وامك

مستر زلال البيض: اه يا عم... انت فيه ايه.... المشاهد القبيحه  
بعديها... عادى

كابتن تفاعفة: قلبك ميّت ياض..... طب ابقى خلى بالك من  
الترجمه... ساعات بتبقى ترجمه مضروبه وكلها كلام شمال

مستر زلال البيض: تصدق انا اتحط عليا في الحوار ده

كابتن تفاعفة: (جمله اعتراضيه من ثلاث احرف) ايه اللي  
حصل !؟

**مستر زلال البيض:** امبارح شغلت الفيلم الاخرانى بتاع البت جينيفر....اللى هو «Red» مش عارف إيه ده

**كابتن تفاقة:** عارفة..... يالهوى.... ده فيلم سكس يا بني

**مستر زلال البيض:** مش ده المهم بابا..... الحوار اللي حصل مالوش دعوة بالفيلم

**كابتن تفاقة:** أمال إيه !!؟

**مستر زلال البيض:** والفيلم بيتدي.... أمي بتقول لأبويا تاكل أو تشرب حاجه على الفيلم يا حج... قام قالها إعمليلي شاي

**كابتن تفاقة:** وبعدين

**مستر زلال البيض:** لقيت أمي بتقولي قوم يا واد اعمل لأبوك شاي... بصيبتها وقولتها: هو الحوار في ثانية اتقلب والواجب بقى عندي أنا خلاص... مش إنتى اللي عزمتي عليه... قام أبويا مزعق فيا وقالى «فز قوم يا عجل».... المهم برطمت في الكلام وأنا قايم قولتلهم بصوت واطى.... "Go to Hell".... والنعمة بصوت واطى

**كابتن تفاقة:** يالهوى

مستر زلال البيض؛ استتى بس... اتارى امي سمعتي...  
قامت ردت عليا وأنا رايح المطبخ وقالتلى "Fuck You".....  
أدي يا عم آخره الأفلام الإنجليزي والترجمات المضروبة  
(انهيار ضحك من صاحبه والعدله وشاب آخر يجلس بالقرب  
مننا )



شكرا دكتور «على طلال».....شكراً «اسلام الجيزاوى»... دتم  
لنا زخراً



# (أستاذ دكتور مراحلض عامة وعلاج بالسيفون)

## الفصيلة: زومبي ميتافيزيقى

اضطرتت أن استعين في أحد الأيام التي عجزت فيها عن القيادة إلى التاكسي الأبيض..... المشكلة إنه كان يتولى زمامه..... رجل... بالحسابات الفلكية والرياضية لا يمكن أن يكون موجود... بس بالحسابات الواقعية...هو كان موجود بالفعل وخاض معايا هذه الملحمة:

الرجل الفلكي ناظرًا إلى العكاز : ألف سلامة عليك

العبدلله: الله يسلمك

الرجل الفلكي: خير إن شاء

العبدلله: لا .... حاجة بسيطة كده

الرجل الفلكي: إيه شرخ ولا تمزق

العبدلله: (إيه ده !!... شكلك فاهم يا نصه) لا...تمزق واللله

الرجل الفلكي: ركبة ولا أنكل

العبدلله: (ده إنت معلم بقى... ده إنت تمسك العكاز وتيجي  
تقعد مكاني) لا... أنكل

الرجل الفلكي: ألف سلامة..... رخم الأنكل ده... متعب ابن الكلب  
العبدلله: آه والله...أنا كنت بعاني في الجبس

الرجل الفلكي: لا.. ما أنا دايقة العذاب ده.... مجرية في رجلي  
اللاتين

العبدلله: يا نهار أبيض..... ده أنا رجل واحدة وعامل مناحة  
الرجل الفلكي: اللاتين يا باشا..... أنا كنت بروح الحمام بس  
بطلوع الروح

العبدلله: آه والله فكرتني...مشوار الحمام ده كان معانة  
الرجل الفلكي: آمال إيه...إلا الحمام....اصل ده هتعمل فيه  
إيه...المثانة تتفجر على طول...الجسم لازم يتخلص من السموم  
العبدلله: صحيح

الرجل الفلكي: شوف حبة ميه محبوسين في جسمك ممكن  
يبهدلوك إزاي

العبدلله: آه والله (أنا شامم ريحة ملحمة في الطريق...ملحمة  
بنكهه النشادر)

**الرجل الفلكي:** أنا عايز أقولك إنى من ساعة مافكيت الجبس  
المرّة التانية... شلت الكابينية اللي عندى... و جبت الحمام كله  
على الأرض وعملته حمام بلدي

**العبدلله:** (أنا صح ... الملحمة بدأت) يا نهار أبيض... معقول

**الرجل الفلكي:** وكتاب الله... زي ما بقولك كده

**العبدلله:** صعب أوي الكلام ده

**الرجل الفلكي:** يا باشا إحنا الغرب ضيعنا..... من كتر  
عشمنا في الخواجات بقينا نقلد عميانى.... الحمام البلدي ده  
استخراع... أولاً لو هتعملها خفيف... مش محتاج غير وإنت  
على الواقف..... على عكس الكبانية... لازم تزيطها وتتشن.....  
ولو ثقيل ولا مؤاخذة.... قاعدة الحمام البلدى دي لا تقدر  
بثمن... بيسموها القرفصاء.... أصح قاعده

**العبدلله:** (بشيء من القشعريرة) بس الأمامية والخلفية  
بيدمروا

**الرجل الفلكي:** والله ابداء..... طب إنت عارف إنهم بره اكتشفوا  
أن ولا مؤاخذة شكل الفضلات اللي خارجه من البنى آدم بالذات  
في الثقيلة..... مؤشر لصحته

العبدلله: ( يا رب توب عليا أنا بطني مكرربة أصلا) إيه ده  
فعلاً !!

الرجل الفلكي: وكتاب الله..... قالك لو شكل حرف «C» يبقى  
إنت عندك مشاكل...و لو حرف «S» يبقى إنت تمام وصحتك  
بمب..... أهو قاعدة القرفصاء بقى بتساعدك تزيطها على  
حرف «S»

العبدلله: (الله يخرب بيت سنينك...إنت شكلك بتتكلم عن  
مكنه السوفت كريم بتاعه ماكدونالز )

الرجل الفلكي: يا باشا....مؤشرات صحتك بتبان من فضلاتك  
وخوارج جسمك

العبدلله: يا سبحان الله (إلهي تتسخط مبوّلة عامة)

الرجل الفلكي: طب عارف البول بقى ولا مؤاخذه....لونه يقولك  
إنت عامل إيه

العبدلله: أنا الحمد لله كويس...إنت عامل إيه

الرجل الفلكي ضاحكاً: هههههه.....حلوة يا باشا.....صحيح  
والله...لون البول ده مؤشر مهم جداً

العبدلله: ( اقطم بقى الله يحرقك) إزاي بقى ؟؟

الرجل الفلكي: يعنى لو مدى على أصفر كناري... كده إنت  
صحتك مش بطالة

العبدلله: (أصفر كناري!!!).....يعني لو "baby blue" يبقى أنا  
كده مثلاً أبقى «أفاتار» ؟)

الرجل الفلكي: ولو فضي رامى على أبيض شفاف... بردك  
حلو... لكن لو بنى بقى... كده إنت عندك مشاكل فى الكبد  
العبدلله: (طب لو عايز أزرق أعمل إيه... أندغ فى الأول لون  
أحمر)

الرجل الفلكي: بلاش.... عارف العرق اللى بنعرقه ده... أكبر  
نعمة... ومع ذلك تلاقي الواحد من دول زي القفص... شاريلك  
مزيل عرق بالشىء الفولاني ومبسوط أوي بريحته..... إيشى  
بريحه الفراولة وايشى بريحة الخوخ..... وميعرفش إنه بيتخلى  
عن نعمة كبيرة.... وسموم الجسم بيتخلص منها.

العبدلله: معاك حق والله.

الرجل الفلكي: عارف زمان... أيام جدي وجدك.... مكنوش  
يعرفوا حوار مزيل العرق ده.... كانوا عشان يتخلصوا من ريحه  
العرق.... يعصروا لمون تحت بطاطهم وبين صوابع رجليهم....  
وساعات يدهنوها خل

العبدلله: (خل ولمون.... إنت بتكلم «سمكة التونة العنيدة» يا  
بني.... الله يحرقك)

الرجل الفلكي: طب بلاش... عارف

العبدلله: لا كفايه بقى أبوس إيدك.... نغيرّ السيرة دي

الرجل الفلكي: ههههههه... ماشي... شكلك قرفت



أصل أنا هرشت الطلعة اللي كانت جاية... كانت هتبقى بعنوان:

(«التفافة»... ثروات مهدرة في شوارع مصر)



# (أحباب الله)

## الفصيلة: زومبي جيل رابع

أثناء صلاة القيام في إحدى ليالي رمضان المباركة... أحد أبناء المصلين والذي لا يتجاوز عمره العاشر... أطلق والده له العنان فأخذ يصول ويجول في المسجد منتقلاً بين المصلين يدب الرعب والفوضى بين الصفوف وإذ فجأه وجدته يقترب مني وكنت ساعتها حاطط الموبايل والنضارة على الأرض قدامي حيث موضع السجود... فسرعان ما تملكني الرعب... وحدث ما كنت أخشاه... فقد وجد هذا الطفل أمامه موبايلي وعليه نضارتي... فوطأ بقدمه اليمنى عليهم... ثم نظر إلي مبتسماً وكأنه يريد أن يرى رد فعلي... فرمقته بنظرات ثاقبه لعل وعسى يرجع ويعود إلى صوابه... وحين أطال الإمام في التلاوة... استمرت النظرات تشع مني موجهة إلى الصبي... ولكن هيهات... بل الأدهى والأمر... إنه اعتقد إنى بتلك النظرات... أسايره في هذه اللعبة الحمقاء... فكان رد فعله إتجاه نظراتي أن ضحك ضحكات طفولية وتراجع ثلاث خطوات للخلف كسوقاً... وقف برهة محتمياً بوالده ثم سرعان ما عاود الكرّ من جديد ودهس النظارة مثني وثلاث ورباع... فقررت أن أتجاهله لعله ينتهي من هذه اللعبة الحمقاء... وقتها انسلت

دموعي مع كل محاولة منه للفت انتباهي عن طريق كارت ديس النظاره بالقدم... وظن المصلين المجاورين لي أنها دموع الخشوع والتأثر بالتلاوة... ولكنها كانت عبرات الحسرة على وسيلتي الوحيدة لرؤية جمال الكون... واللى الشاسيه بتاعها تقريباً بقى شبه التروسيكل. انتهت الصلاة... إلتقطت النظارة من على الأرض... باتت أشلاء.... نظرت إلى الأب بجانبى فوجدته يتجاهل نظراتي ويركز بصره على النظارة... انتظرت منه ال «Action» المتين... عشان أنا معملش معاه ال «Reaction» السليم... فوجدته يحتضن ابنه ويقول له برقه بالغة:  
كده النظارة بتاعه عمّو.

**(قبلة في رأسه)**

مش عيب كده

**(ثم قبلة أخرى في خده الأيمن)**

مش قولنا ما نلعبش في حاجة مش بتاعتنا

**(ثم قبلة أخيرة في خده الأيسر)**

ثم انتفض من مجلسه وحمل الابن ورحل في صمت... كل هذا في ظل تجاهل تام لوجودي ودون أدنى محاولة للإعتذار الشفهي أو حتى النظر إلي...فاكتفيت بالقبلات الثلاث واستعوضت المولى في النضارة.

|    |                                                           |
|----|-----------------------------------------------------------|
| ٧  | .....: (تنويه ولا بد منه)                                 |
| ١١ | .....: (دليل المستخدم)                                    |
| ١٧ | ..... : (ما تيجى يا هندزة)                                |
| ٢٥ | ..... : (هزار الألفية الثالثة)                            |
| ٢٩ | .....: (أ.د. استشاري إطارات/عبده كاوتشات)                 |
| ٣٧ | ..... : («صباحي».... الظاهرة)                             |
| ٤٣ | .....: (الأتوبيس كومبلييه - مع واحد أمبلييه)              |
| ٥١ | ..... : (المتزوجون VS السناجل)                            |
| ٥٩ | .....:(إذاعه الفتية الشرعية)                              |
| ٦٧ | ..... : (شلة المغاوير)                                    |
| ٧٥ | ..... : (العنقاء واللحية الحمقاء)                         |
| ٧٩ | ..... : (يوم من عمري)                                     |
| ٨٧ | .....: (هو إنترنت كافيه ولا سايبير : إنت عايزها إيه §) .: |

|     |                                                         |
|-----|---------------------------------------------------------|
| ٩٣  | .....: (الغولوم المعدل وراثياً)                         |
| ١٠١ | .....: (ستيفن... مات)                                   |
| ١٠٥ | .....: (نفخه في الشوكمان)                               |
| ١١١ | .....: (Bad Mom بالعربي)                                |
| ١١٧ | (الرجال من المريخ والنساء من الزهرة وهذا السائق من زحل) |
| ١٢٣ | .....: (أربع بنات وزابط «أداء»)                         |
| ١٢٧ | .....: (الرهانات المعدلة وراثياً)                       |
| ١٣١ | .....: (احتفالية عيد الأم)                              |
| ١٣٥ | .....: (ملحمة القناديل المضيئة)                         |
| ١٤١ | .....: (العيد فرحة... يا سلام ؟)                        |
| ١٤٥ | .....: (الثقافة الجنسية.. مطلب قومي !)                  |
| ١٥١ | .....: (الغيارات متعددة الاستخدامات)                    |
| ١٥٧ | .....: (أحمد فؤاد نجم التاكسيات)                        |
| ١٦٣ | .....: (حديث الساعة)                                    |
| ١٦٧ | .....: (أخذ الناقة... وشرخ)                             |

- ١٧٣ .....: (بويكا... وفورمة الساحل)
- ١٧٧ .....: (الجمعة... الثالث عشر من أيلول)
- ١٨٣ .....: (٢٠١٨/٨/٨)
- ١٨٩ .....: (العقل مال من الترجمة الشمال)
- ١٩٣ .....: (أستاذ دكتور مراحيض عامة وعلاج بالسيفون)
- ١٩٩ .....: (أحباب الله)

حقوق الطبع محفوظة للناشر



أطلس

للنشر والإنتاج الإعلامي

يحظر نشر أو اقتباس أى جزء  
من هذا الكتاب إلا بعد الرجوع  
إلى الناشر